

**BSP makim Earth Hour 2016 - P3**



**PNG Air mekim winmani - P4**



**Rot bai helpim gut developmen bilong Bogenvil - P14 - 15**

**Baim 100 RIM** A4 KOPI PEPA

REFLEX PURE WHITE

NA KISIM **FRI** 2 LITA KULA WANTAIM 10 LITA ESKI

PROMOSEN BAI INAP NAMBA 31 DEI BILONG MUN MAS 2016

Only at... **THEODIST LTD**

THE STATIONERY SUPERMARKET

Waigani Drive, POM Ph:313 9800 sales@theodist.com.pg

Markham Road, LAE Ph:472 5488 saleslae@theodist.com.pg



**Ista...**  
 Yumi tingim em tu?  
 Em dai long diwai kros long rausim olgeta pekato bilong yumi...  
 Lukim komentri long p13 long ista tingting...

# Tokaut stret long prais bilong LNG

**MEMBA** bilong Sinasina-Yongomugl, Kerenga Kua, i askim gavman long tokaut stret long prais bilong LNG.

Mista Kua i autim dispela toktok long Palamen long Tunde dispela wik taim em i skelim olsem toktok bilong Praim Minista Peter O'Neill na Fainens Minista James Marape i no stret long prais bilong LNG.

Mista O'Neill i tok gavman i kisim liklik mani long LNG long bikos prais bilong LNG long wol maket i pundaun i kam daun.

Mista Kua i tok Fainens Minista James Marape i bin tok prais bilong PNG LNG bai no inap go antap o pundaun i go daun bikos ol baia i bin wanbel long baim LNG bilong yumi long wankain prais tasol.

Tripela kantri, Japan, Saina na Taiwan, i baim PNG LNG.

"Taim prais bilong oil na

ges i pundaun long intenesenel maket, mi no bin wari bikos mi bin ting prais bilong PNG LNG bai no inap senis bikos Minista Marape i bin autim dispela toktok pastaim.

"Ol sampela memba tu i bin harim pinis dispela toktok bilong Marape. Ol pipel bilong yumi long kantri tu i harim pinis," Mista Kua i tok.

Mista Kua, husat i pastaim Ateni Jeneral, i tok gavman nau i mekim narapela kain toktok gen.

"Gavman i no mekim wanpela toktok. Toktok bilong Praim Minista na Fainens Minista i no kamap wanpela.

"I luk olsem samting i no kamap stret. Praim Minista O'Neill i wok long tok pundaun bilong oil na ges prais long intenesenel maket i daunim mani mak PNG inap long kisim long LNG.

*I go moa long pes 2...*



**Connecting PNG and the world.**

Call toll free 180 3444 for more information.

**Air Niugini**   
 www.airniugini.com.pg



# K40,000 Win Moni

wanwan long 4pla  
laki lain bai winim  
**K10,000**  
Sekim hau long joinim  
resis insait long ol  
stoa mipla makim



Gutpla taim wantaim Meadow Lea

## Ikonomi gro long 9 pesen

PRAIM Minista Peter O'Neill i tok nesanel ikonomi i wok long gro long 9 pesen long wan wan yia.

Mista O'Neill i mekim dispela toktok long Tunde long Nesanel Palamen taim Oposisen Lida Don Polye i askim em long olsem wanem gavman i wok long menesim ikonomi bilong dispela

kantri taim ol komoditi prais long intenesanel maket i wok long pundaun i kam daun.

"Ol ripot i kam long Tre-seri Dipatmen na Sentral Benk wantaim i tok ikonomi bilong kantri bilong yumi i wok long gro long 9.2 pesen long olgeta yia.

"Dispela i soim olsem ikonomi bilong yumi i no

bungim hevi. Ikonomi i wok long gro gut. Oposisen Lida i mas bilip strong long dispela ikonomi," Mista O'Neill i tok.

Em i tok wanpela wok bilong Sentral Benk em long kamapim monetari polisi na gavman i no gat rait long kontrolim benk.

Mista O'Neill i tok Sentral Benk i save lukautim ol foren eksens risev, ol in-

tres reit na ol mani bilong yumi na bilong ol arapela kantri.

Mista Polye i tok gavman i no menesim gut ikonomi bilong dispela kantri. Em i tok O'Neill-Dion Gavman i no ken stap moa bikos em i no fit long lukautim ikonomi bilong kantri.

Tasol Mista O'Neill i tok wanem samting i wok long kamap ausait long

PNG wok long kamapim ol hevi bilong ikonomi long kantri bilong yumi.

"I no PNG tasol. Olgeta kantri i wok long bungim dispela hevi. Ol prais bilong komoditi o ol samting bilong salim na kisim mani i wok long go daun.

"Prais bilong oil i bin pundaun isi isi long yia 2011 yet," Mista O'Neill i tok.

## Tokaut stret long prais bilong LNG

### I kam long pes 2...

"Na Mista O'Neill i tok dispela i lukim PNG no kisim moa mani long LNG," Mista Kua i tok.

Las yia, Minista Marape i bin tok PNG i stap gut long han bilong gutpela gavman bikos gavman i bin sainim agrimen long salim LNG i go long Saina, Taiwan na Japan long fowet fiks prais.

Em i bin tok fowet fiks prais i min olsem prais bilong PNG LNG i go long Taiwan, Saina na Japan bai stap wankain tasol.

Ol dispela tripela kantri bai baim LNG bilong PNG long wankain prais we ol i bin wanbel aninit long PNG LNG Gas Sales agrimen, maski prais bilong LNG i go antap o i pundaun long intenesanel maket.

Minista Marape i bin autim dispela toktok long PNG Up-Date semina long Yunivesiti ov PNG (UPNG) las yia.

Long taim bilong katim 2016 Nesanel Baset Tresera long Novemba las yia, Tresera Patrick Pruaitch bin mekim wankain toktok olsem Mista Marape i mekim.

"PNG i stap gut bikos mipela i salim LNG long fowet fiksd prais. Pundaun bilong oil na ges prais bai no inap kamapim hevi long ikonomi bilong mipela," Mista Pruaitch i tok.

Mista O'Neill i tok toktok bilong Mista Marape em i stretpela toktok bikos Japan, Saina na Taiwan bai baim PNG LNG long wankain prais i go inap 20 yia aninit long ges sels agrimen.

Oposisen Lida Don Polye i tok Mista O'Neill, Mista Marape na Mista Pruaitch i no ken paulim ol pipel bilong dispela kantri.

## Oposisen givim toksave long vot i no gat bilip

OPOSISEN i givim ol pinis toksave long opis bilong Palamen Spika long kirapim mosen bilong vot i no gat bilip egensim gavman.

Long Tunde dispela wik taim Palamen i kirap gen, Deputi Oposisen Lida Sam Basil i bin movim dispela mosen na Is Sepik Gavana Sir Michael Somare i bin sekenim taim Oposisen Lida Don Polye i witnessim.

Sir Micheal em memba bilong Nesanel Alaiens (NA) pati. NA em i wanpela meja kolisen patna long gavman.

Ekting Spika Aide Ganasi bin kisim dispela toksave pepa pas-taim long Palamen i statim sinduan bilong ol memba.

Mista Ganasi bai givim dispela toksave pepa i go long ol komiti memba bilong Praivet Membas Komiti na sapos ol samting long dispela toksave pepa i stap gut, dispela komiti bai givim tok orait long larim Oposisen i kirapim vot i no gat bilip.

Bihain long 7-pela de, sapos dispela komiti, husat i save bung



Don Polye na Sam Basil i laikim gavman long skelim strong long flo bilong Palamen.

long wanpela de long olgeta wik, i lukim ol ol samting i stap gut long dispela toksave pepa, ol bai givim tok orait na Palamen Spika

bai givim tok orait long kirapim dispela vot egensim O'Neill-Dion Gavman.

Mista Basil i tok gavman i mas

larim dispela vot i kamap. Em i tok gavman i no ken stopim dispela vot olsem em i bin mekim tupela taim las yia long mun Oktoba na Novemba.

Mista Polye i tok ol memba long gavman na oposisen sait wantaim i sapotim dispela mosen bilong kirapim vot i no gat bilip na em bilip olsem Praivet Membas Komiti wantaim Palamen Spika bai larim dispela vot i go het yet.

Mista Basil i tok dispela nupela toksave pepa i no olsem tupela pastaim toksave pepa Oposisen i bin givim las yia.

"Mipela i stretim gen na givim namba tri taim gen. Mi bilip olsem no gat wanpela saming i rong long dispela pepa na ol komiti na Palamen Spika bai larim vot i go het bihain long 7-pela de," Mista Basil i tok.

Mista Basil i tok gavman i no ken suruk na stopim vot i kamap. Em i tok gavman i gat bikipela namba na em i mas larim dispela vot i kamap.

**Easter Eggstravaganza**

Buy any bmobile-vodafone products (Phone/SIM card/Top up/Data) & get into a draw to win.

- 3 winners: Coleman Barbeque-Set
- 5 winners: Star Audio Speakers
- 10 winners: Vodafone Smart 4 Fun

Offer valid from the 17th to 24th March 2016.

76003555 or 1555  
connect@bmobile.com.pg  
www.bmobile.com.pg

bmobile | vodafone



# BSP makim Earth Hour 2016

**BSP i joinim pinis PNG, Fiji, Solomon Islands, Cook Islands, Samoa, Tonga na arapela 178 kantri na teritori long olgeta hap long wol long makim Earth Hour long las wik Sarere, 19th Mas.**

BSP i kamapim dispela aninit long BSP Go Green long kirapim ol gutpela tingting long mekim awenes long helpim ol manmeri i lukautim envairomen, na tu long sanap wantaim moa long milien manmeri long wol kamap olsem lait long sain antap long klaimet senis.

Het tok bilong 2016 Earth Hour i lukluk long, "Ol eksen bilong yumi, olsem wan wan manmeri na global komyuniti, i gat pawa long senisim dispela wol long gutpela bilong ol manmeri husat bai stap long bihain taim – nau em i taim bilong mekim eksen egensim klaimet senis."

Long makim dispela Earth Hour, BSP i bin stopim ol pawa lait long olgeta opis bilong ol long PNG na Pasifik long 8:30 i go inap 9.30 long Sarere nait. Dispela kempein em go wantaim Go Green

kempein bilong BSP.

Earth Hour em i wanpela global ivent we World Wildlife Fund (WWF) i bin kamapim long yia 2007 long Sydney, Australia. Bihain long dispela, planti manmeri na kampani i bin sapatim dispela ivent.

Dispela yia, 350 bilong ol bikpela mak na tawa olsem Eiffel Tower, Empire State Bilding, Taipei 101 na Sydney Opera Haus I bin stopim lait bilong ol long makim dispela awa.



Ol sumatin long Kimbe long 2015 BSP Go Green kempein, we Earth Hour tu em i kam aninit long dispela Go Green kempein.

**60+ EARTH HOUR**

**SWITCH OFF TO SHINE A LIGHT ON CLIMATE CHANGE**

**EARTH HOUR 2016**  
SATURDAY 19TH MARCH 8.30-9.30PM

**GO GREEN** Switch your lights off  
BSP [www.bsp.com.pg](http://www.bsp.com.pg)

BSP i bin stopim ol lait long opis bilong ol inap wan awa long las wik Sarere nait.

# Gavman mas lukaut long bikpela populesen

OPOSISEN Lida Don Polye i tok gavman i mas laukaut long populesen bilong PNG i wok long gro i go moa yet.

Mista Polye i tok ol besik sevis gavman i wok long givim i go long pipel i no inapim namba bilong ol manmeri long kantri.

Em I tok dispela i no soim gutpela piksa bikos gavman bai lukim planti nogut samting i kamap long kantri sapos ol manmeri i no kisim gutpela sevis.

"Gavman mas balensim sevis na lukim namba bilong manmeri na givim sevis. Em i no ken passim ai na givim sevis nating," Mista Polye i tok.



Peter O'Neill



Don Polye

Em i tok 3.1 pesen populesen grot reit bilong PNG em i antap

tumas taim yumi skelim wantaim Nu Silan, we populesen grot reit

bilong em i 0.88 pesen na total populesen em i 4.6 milien.

Mista Polye i tok nesanel senses long yia 2010 i bin rekodim 7.3 milien manmeri.

"Oposisen i ting bikpela hevi yumi wok long bungim nau em i no long populesen tasol long menesim ikonomi long taim bilong bikpela populesen grot," Mista Polye i tok.

Praim Minista Peter O'Neill i bin tok populesen bilong PNG em i moa long 7.3 milien. Mista O'Neill i ting populesen bilong PNG em i sanap olsem 10 milien.

"Gavman i givim gut sevis, ol besik sevis we pipel bilong yumi i

nidim. Skul, haus sik, rot na bris, kirapim ikononik developmen, stretim asua bilong lo na oda. Dispela em ol sevis ol manmeri bilong yumi i nidim.

"Na gavman i wok long givim dispela ol sevis long olgeta distrik na provins. Gavman i save olsem populesen bilong kantri em i sanap long 8 milien mak. Nau em i mas go antap long 10 milien. Yumi no gat wanpela gutpela rekot.

"Tasol gavman i kirapim planti nupela rot na bris, sip bris, ples balus, na ol arapela gutpela samting long kirapim sans bilong helpim ol manmeri long kamapim gutpela sindaun.

## SAVING FOR A REASON?

**BEFORE**

**SAVINGS IN A JAR**

- ✓ Easy access to spend.
- ✓ No interest earned.
- ✓ Funds are not secure.

**NOW**

**SAVINGS BSP PLUS SAVER**

- ✓ No Card Access.
- ✓ Tiered credit interest.
- ✓ Linked to Mobile & Internet Banking.

**A BSP Plus Saver Account for every savings goal**

- Home Equity
- Dream Wedding
- Medical Bills & Emergencies
- Birthday Party
- New Gadgets & Phone
- Overseas Holiday

[www.bsp.com.pg](http://www.bsp.com.pg) [f](#) [t](#) [in](#)



# PNG Air mekim winmani

**BALUS kampani bilong PNG yet, PNG Air, i mekim K4.21 milien win mani long ya 2015.**

Long wanpela ripot PNG Air i salim i go long Pot Mosbi Stok Eksens (POMSoX) long Mas 15, em i tok PNG Air i bin mekim dispela winmani maski ol sata operesen bilong em long PNG LNG Projek i stop.

Maski ol salens i kam taim balus sata bisnis bilong PNG Air i pundaun long ol risos projek, ol mani PNG Air i kisim long ol pasindia na kago i kamapim dispela winmani bilong 2015 fainensal yia.

Ol dairekta bilong PNG Air i bin tok yia 2015 i bin gutpela yia bilong dispela balus kampani taim em i bin lukim nem bilong em i



**Namba wan ATR balus long Daru ples balus.**

senis.

Wantaim dispela senis long nem bilong kampani, PNG Air i bin baim tupela nupela ATR 72 600 balus PNG Air bai baim 5-

pela moa nupela ATR 72 600 balus long pinis bilong yia 2017.

Long pinis bilong dispela yia, PNG Air bai baim tripela moa balus. Kampani i lukim mani

em i save kisim long ol pasdia i go antap long long 29 pesen long yia 2015.

Liklik mani tasol i bin kam long nupela ATR balus.

# Zeming egensim Oposisen

MINISTA bilong Fiseris na Deputi Lida bilong Pipols Nesanel Kongres (PNC) Pati, Mao Zeming, i egensim Oposisen long kirapim dispela vot i no gat bilip long gavman.

Mista Zeming i tok dispela tingting na plen bilong Deputi Oposisen Lida Sam Basil long kirapim dispela vot bai westim gutpela taim long mekim sampela gutpela wok bilong kirapim kantri.

“Olgeta taim Palamen i save sindaun, Oposisen i save tok ol bai kirapim mosen long kamapim vot i no gat bilip tasol dispela i no save kama na o yet i

save sem,” Mista Zeming i tok.

“Ol i no ken westim taim nating long dispela vot. Palamen i sindaun long kamapim sampela gutpela lo bilong helpim dispela kantri na ol Oposisen memba i westim taim.

“Nesanel Palamen bilong yumi em i no wanpela ples wer Sam Basil i ken pilaim ol liklik gem bilong em.

“Em i mas lainim sampela moa samting long ol institusen olsem Nesanel Palamen.

“Ol pipel bilong Papua Niugini aninit long ol wan wan lida bilong ol i givim pawa long

Praim Minista Peter O'Neill long ranim dispela kantri long 5-pela yia.

“Sam Basil na ol poroman memba bilong em long Oposisen bai gat sans long kamapim nupela gavman long 2017.

“Nau ol i mas lukluk gut na kamapim ol polisi long kirapim na ranim gut dispela kantri.

“Dispela tingting bilong Oposisen long daunim gavman we pipel i givim pawa long ranim dispela kantri i no gutpela samting.

“Mi hat long tingim wanpela gutpela samting Sam Basil i mekim long kirapim gut-

pela polisi bilong ranim kantri.

“Wanem ol polisi bilong yu long edukesen, helt ke, lo na oda?”

“No gat wanpela man i save bikos mipela tu i no save harim wanpela gutpela polisi i kam long maus bilong Mista Basil.

“Ol pipel i les pinis long harim dispela kain ol samting i kam long maus bilong Oposisen.

“Gavman i laik kamapim wanpela nambawan lo long dispela sindaun bilong Palamen, we dispela nupela lo bai helpim planti manmeri bilong dispela kantri na bringim sevis i kam.

# Seif Madahud long Westen Hailans

INSAIT long wanpela yia, PNG i save lusim 1,500 meri na ol yangpela pikinini meri taim ol i karim pikinini.

Olsem na seif madahud na famili plening i bikpela samting long sapotim matanel helt o daunim hevi bilong ol mama i save dai taim ol i karim pikinini insait long dispela kantri.

Insait long wanpela bung we Westen Hailans Provins Helt Edministresen i bin patna wantaim Safe Motherhood Alliance PNG (SMALL PNG), United Nations Population Fund (UNFPA) na World Health Organization (WHO), long holim tripela de bung long edresim ol wari na hevi bilong seif madahud na famili plening.

Bung i bin lukim tu olsem long las yia, 20156-pela dai tasol long ol mama lsten Hailans bihain long ol i karim pikinini long las yia, tasol dispela em ol i ripotim tasol.

“Planti i no save ripo-

tim ol keis long Westen Hailans, maski planti yangpela meri i dai pinis, long taim ol i laik karim pikinini. Ol i no save ripotim planti keis i go long ol wan wan provin sel atoriti na olsem, mak i stap daunbilo,” Dokta Josef Kui em Senia Medikol Opisa na dokta bilong ol meri i tok.

Samting olsem 60 helt na medikel opisa bilong olgeta hap bilong provins, ol feit beis oge naisesen an ol NGO i bin bung long toktok long ol salens na long rot i go fowet long dispela eria.

Dairekta bilong SMALL PNG, Catherine Fokes, i bin tok bikpela as tingting long holim forum o bung em long strongim ol nesanel helt polisi we i sapotim matanel helt, putim moa mani long famili plening na riprodaktiv helt, na tu, long sapotim na strongim wok poroman namel long ol stekholda bilong gavman na non gavman oge naisesen.

Westen Hailans Gavana, Paia Wingti i bin

kamap long bung na sapotim seif madahud program long provins bilong em na tu, long statim ol seksual helt program bilong ol yngapela pipel long ol sekondari skul.

Siaman bilong PNG Palamenter grup long Populesen an Sastenebol Developmen, Ken Fairweather, i bin tokaut long wari we PNG i no inapim ol divelopmen gol bikos populesen long kantri i wok long go bikpela hariap.

Em bin tok moa olsem family plening bai daunim ol hevi tasol i mas gat fulaim woklain long karimaut I autris program.

Kelwyn Browne long Rural Praimeri Helt Sevis Deliveri Projek i bin toktok long ol papa na i bikpela samting long ol i save long helti famili rilesensip.

Em bin tok ol man i hap o pat long daunim ol mama i save dai taim ol i karim pikinini, na tu, ol i nidim ol i strongim seif madahud program i ran gut.



**INTERNAL REVENUE COMMISSION**



## PABLIK NOTIS

### GANISI NOTIS ANINIT LONG SEKSEN 272 BILONG INKAM TAKIS EKT LONG OL AUTSTENDING INKAM TAKIS

Intenel Revenu Komisin i laik tok save long ol takis peia olsem em i strongim nau ol wok bilong mekim ol pipel i mas bihainim ganisi notis long baim ol inkam takis, saleri na wej takis, GST, trening levi na bisnis peimen takis.

Sapos yu save olsem yu no baim yet inkam takis, saleri na wej takis, GST, trening levi na bisnis peimen takis, orait moabeta yu baim ol dispela takis NAU TASOL sapos yu no laik kisim wanpela ganisi notis. Yu ken baim ol dispela takis long ol opis bilong mipela long wan wan provins o ol kastoma i ken baim long online banking bilong Bank South Pacific, ANZ na Westpac.

Ganisi notis em i wanpela lugal dokumen mipela bai givim long fainensel institusen bilong yu o wanem arapela ted pati i lukautim mani bilong yu, o i gat dinau mani em i mas baim yu. Husat i kisim ganisi notis i mas bihainim lo aninit long Seksen 272 bilong Inkam Takis Ekt 1959 long baim dispela mani i go long IRC long taim ol i makim. Mani mipela i kisim long dispela rot bai i go long stretim autstending takis bilong yu.

Harim gut tok save, husat manmeri i kisim ganisi notis i no ken givim mani i go long takis peia nem bilong en i stap long dispela notis, inap em i stretim olgeta autstending takis mani wantaim IRC.

Husat manmeri i kisim wanpela ganisi notis i mas baim IRC, hamas mani ol inap long baim, i go inap long mak long mani i stap long notis, i go long IRC.

Husat manmeri i kisim ganisi notis na i no bihainim oda, bai i baim ful mak bilong mani i stap long notis, o mani ol i mas baim, o narapela lain i lukautim long nem bilong yu, we mak bilong mani i daunbilo.

Husat manmeri i no harim tok em i brukim lo na i ken kamap long kot na baim kot long mani mak namel long K500 na inap long mak bilong K5,000.00.

**Yu ken kisim moa tok save long ol dispela opisa:**

|                           |                  |                             |
|---------------------------|------------------|-----------------------------|
| Mr Harry Utikao           | Telepon: 3226635 | Email utikaoh@irc.gov.pg    |
| Ms Martha Tavi            | Telepon: 3226681 | Email tavim@irc.gov.pg      |
| Mr Dollacrusse A Potjepat | Telepon: 3226664 | Email augustined@irc.gov.pg |

Authorised by:  
**Betty Palaso, OBE**  
Commissioner General



**Ol lain i bin stap long tripela seif madahud forum.**

## Minista tok amamas long EU

MINISTA bilong Edukesen, Nick Kuman i tok amamas long Yuropien Yunien (EU) long wok bung bilong en wantaim edukesen dipatmen long kirapim ol bikpela infrastraksa long Balop tisa Koles long mani mak bilong K5.4 milien.

Patnasip i stap insait long Human Risos Developmen Program Fes 1 bilong Edukesen Dipatmen, long pinisim ol klasrum, haus bilong slip na waswas rum we ol i bin opim long Fraide 18 Mas 2016.

Bikpela tingting bilong HRDP1 em long inapim bikpela developmen praioriti bilong Gavman na bilong olgeta hap graun. Projek em i lukluk long

kamapim gut save bilong menesmen bilong edukesen sistem bilong PNG na long kamapim gutpela akademik na menesmen skil na besik edukesen bilong ol skul tisa na long ol tisa inap long kisim ol pri-sevis na in-sevis trening.

"Long makim Gavman, mi tok amamas long dispela patnasip wantaim EU we i karim gutpela kaikai we i mekim gut ol projek bilong trening bilong ol tisa bilong Balop Tisa Koles long Lae, i pinis long taim. Ol arapela tisa koles i stap aninit long dispela patnasip em long Madang Tisa Koles na Gaulim," Minista Kuman i tok.

Mista Kuman i tok, samting EU i putim em

i bihainim polisi bilong Gavman bilong kamapim gutpela kwaliti praimeru edukesen bilong olgeta sitisen.

Ol nupela fasiliti i gat 6-pela klasrum we inap long kisim 40 sumatin bai stap insait long wan wan klasrum, wanpela opis bilong 6-pela tisa na wanpela stua rum. Haus slip i gat 43 rum na inap long holim 203 sumatin.

Em i gat tupela komon rum na ol bedrum i gat bet, kapot na stadi des. Ol dispela fasiliti i gat we bilong lukautim ol lain i gat bagarap long lek tu. Ol rum waswas i gat 12-pela sawa, 8-pela toilet, 10-pela han besin na 8-pela londtri tab.

# Yumi draiva bilong edukesen

**EDUKESEN Minista, Nick Kuman, i bin tok tok long taim bilong Ista olsem olgeta pipel na sitisen husat i gat wok long ranim edukesen em i draiva bilong edukesen.**

Em i tok, ol lain husat i gat wok long edukesen sekta i mas kisim bel kirap bilong Ista taim na strongim tingting bilong ol long karim aut ol edukesen sevis wantaim bikpela tingting long kamapim gutpela kwaliti edukesen bilong olgeta wan wan sitisen.

"Ol sumatin, papamama, ol ples bilong skul na ol atoriti i gat

wok long dispela na ol i no ken ranawe long wok bilong ol long kamapim gutpela edukesen kwaliti.

Olgeta man i bungim han bai kamapim gutpela wok," Mista Kuman i tok.

Em i tok Ista em i taim bilong stap wanbel na hop bai kamaples klia long ol sumatin, ol tisa, papa na komyuniti long wok strong long kamapim strongpela edukesen sistem we i go het yet.

Planti gavman i putim planti mani i go insait long edukesen.

Polisi bilong gavman

long Tuisen Fi Fri edukesen i winim olgeta narapela polisi insait long laip bilong palamen.

Ol senis we i kamap nau long edukesen sistem bilong yumi em i bilong stretim ol pikinini bilong yumi long kisim gutpela kwaliti edukesen.

Long kamapim kwaliti, olgeta lain draiva bilong edukesen sistem bilong yumi na ol lain i kisim samting long en i mas mekim wok bilong ol gut.

Tisa i mas lainim gut ol sumatin, ol sumatin i mas skul gut, na ol-

geta sitisen i mas lukautim gut ol institiuisen na ol asSet bilong ol.

Long taim bilong dispela Ista 2016, yumi olgeta long edukesen sekta i mas strongim gen komitmen bilong yumi long wanem samting yumi mas mekim long edukesen sistem i ran gut.

Yumi olgeta i mas mekim wok i gat mincing, bikos blut bilong kantri bilong yumi ran wantaim wanem senis yumi mekim insait long edukesen bilong yumi," Mista Kuman i tok.

## Skul i amamas long nupela TV program



Sari Primari skul Gret 8 sumatin bihain long EQUITYV klas sanap klostu long EQUITYV risiva disk wantaim Saiens tisa, Keran Lingam, Het tisa Misis Theresia Nea na Bot Siaman, Anton Kondon.

### Ale Asa i ratim

SKUL insait long Enga provinis i amamas long yusim nupela EQUITYV program ol i bin lonsim las yia wantaim helpim bilong Nesenel Edukesen Dipatmen.

Sari primari skul insait long Wabag distrik em i wanpela bilong 20 skul i kamapim risiva disk na i amamas long kisim klas long EQUITYV program.

Gred 8 saiens tisa bilong Sari primari skul, Keran Lingam wantaim ol sumatim i amamas long

nupela EQUITYV program kamap long skul na i mekim ol sumatin i lanim planti gutpela samting.

"Yumi statim skul wantaim EQUITYV klas na lanim planti nupela na gutpela samting.

"Dispela program i skulim ol sumatin gut tru bai ol i kisim planti save long kainkain eria bilong saiens na kamapim konfidens (o pasin long gat bilip long ol yet) long ol sumatin," Mista Lingam i tok.

Gortina Amos husat i trensef i kam long wan-

pela skul long Morobe provinis i tok em i amamas tru long EQUITYV klas.

"Mi no bin kisim EQUITYV klas long pastaim skul long Morobe na dispela i nupela tasol mi amamas olsem mi lanim gut tru planti gutpela samting," Gortina i tok.

Tasol Mista Lingam i tok, em i no isi long kisim klas wantaim EQUITYV program bikos dispela program i nidim komitmen na taim menesmen.

Em i tok sapos ol i misim wanpela klas, em ol bai paul bikos TV bai no

inap ripitim wanem samting i go pinis.

Het tisa bilong skul, Theresia Nema, i tenkyu long Japan International Cooperation Agency (JICA) wantaim Papua Niugini edukesen dipatmen long kamapim dispela skul program.

Siaman bilong skul, Anton Kondon, wantaim deputi het tisa, Leo Nai i tok ol bai painim mani na putim TV long wanwan klasrum bilong Gred 8 na 7 bikos ol i yusim konprensum long kisim EQUITYV klas.

## Emmanuel i strong long skul

"TAIM mi bikpela, mi laik wok na kisim mani na mi ken kam bek long ples na lukautim papamama bilong mi.

"Olsem na mi no save lusim skul long wanpela de tu na mi laik lukim skul bilong mi i gro," Emmanuel i tok.

Dispela em stori bilong Emmanuel Wan, pikinini man mama i karim wantaim no gat han. Maski em i gat hevi, dispela i no stopim em long strong long skul na mekim gut, o mekim ol samting we ol liklik mangki i save mekim.

Mama bilong em, Veronica Wan i tok em i gat bilip long Emmanuel, maski em i gat spesel nid long nogat han.

"Em i save helpim long kisim wara, kuk na lukautim tupela liklik brata na susa bilong em. Mi laikim tasol gutpela samting i mas kamap long em," Mama Veronica i tok.

Veronica i tok em i

no bin gat tingting long salim Emmanuel i go long skul bikos em i disebol na tu, skul i stap longwe.

"Mi bin ting em i no nomol pikinini na em no inap holim pen long rait wantaim, tasol mi rong.

Em i save rait long lef lek nae m i gat bikpela laik long skul," Mama Veronica i tok.

Em i tok long las yia, Emmanuel i bin mekim gut tru long skul na i kamap daks long Kunmong Elementeri skul, nae m i bilip olsem em bai wokim wankain long dispela yia.

Emmanuel em i namba wan pikinini long famili na em i gat narapela tupela bihain long en.

Em i pilim olsem em i mas lukautim tupela brata na susa bilong em, maski em i disebol.

Emmanuel i tok em i laik pinisim gut skul na kamap wanpela man i gat nem insait long komyuniti.

"Mi amamas olsem yupela i kam putim skul long graun bilong mi,

Mii gat bikpela laik lo skul tasol me laikim yupela helpim me na putim sam-pela moa skul klasrum insait long ples na mipela ken skul i go yet na pinisim praimeru Emmanuel i tok."

Taim ol i askim em long tingting bilong em long helpim we gavman bilong Australia i giivm long Kunmong Elementeri skul, em i tok em i amamas tru bikos sapos no gat, em bai no inap go skul.

Kunmong Elementeri skul i stap long Koma Peng eria insait long /Tambul/Nebilyer Distrik long Westen Hailans provins. Gavman bilong Australia aninit long Strongim Pipol Strongim Nesen Program (SPSN) i bin fandim skul klasrum projek wantaim mani mak inap long K70,848.60.



Emmanuel wantaim mama bilong em.



# Gavman lukluk long kamapim nupela moa ilektoret

**GAVMAN** i tingting long kamapim sampela moa ilektoret long PNG we populesen bilong manmeri i bikpela, Praim Minista Peter O'Neill i tok.

Mista O'Neill i tok sampela ol ilektoret long PNG i gat bikpela ples na bikpela namba bilong manmeri.

Em i tok gavman i tingting long tokim Ilek-toral Bandris Komisnin (EBC) long lukluk gut long kain ol ilektoret olsem Kandrian-

Gloucester, Kairuku-Hiri, Talasea na Porgera-Lagaip i mas bruk i go kamap tupela ilektoret bikos ol i gat bikpela namba bilong manmeri i stap.

Mista O'Neill i tok long olgeta 10-pela yia, EBC i save sekim gen na skelim ol bandri bilong ol wan wan ilektoret long kantri.

Em i tok long yia 2012, gavman i bin larim EBC i lukluk gen long sampela ol bandri insait long

kantri na dispela I bi n lukim Hela na Jiwaka i kamap provins.

Em i tok planti manmeri i wok long muv go kam long wanpela na narapela ples na gavman i luksave olsem i gat nid long EBC i glasim sampela ol provins na sekim sapos ol i nidim nupela moa ilektoret.

"I luk olsem sia bilong Palamen bai go antap long 120 bikos gavman i tingting long tokim EBC long katim nupela bandri gen long sampela ol ilektoret we i gat planti manmeri.

"EBC i save wok long em yet na wok bilong em no gat wanpela man

i save askim. Palamen bai kamapim wanpela nupela lo long givim mani i go long Ilek-toral Komisnin na mekim dispela wok.

"Sif Ilek-toral Komisina em i siaman bilong bandris komisim na gavman laik givim sampela moa mani long komisim long kirapim dispela wok," Mista O'Neill i tok.

Em i bin mekim dispela toktok taim Memba bilong Porgera-Lagaip, Nixon Mangape, i bin askim em sapos gavman i ken lukluk long katim ilektoret bilong em i go kamap tupela bikos populesen em i bikpela tumas long Porgera-Lagaip.

## Juffa: Provinsal gavman bai helpim skul

ORO Gavana Gary Juffa i tok Popondetta Egrikalsa Kolis em i wanpela bikpela skul long provins na provinsal gavman i lukluk long givim mani na kirapim dispela skul.

Dispela skul i stap olsem Oro kempas bilong Yunivesiti ov Nesural Risos na Envairomen (UNRE) tasol Memba bilong Ijivitari, David Arore, i bin tingting long kirapim dispela skul i kamap Isten Papua Haia Institusen taim em i bin



Gary Juffa

stap Minista bilong Haia Edukesen. Mista Arore i askim Minista bilong Haia Edukesen, Malachi Tabar, long olsem wanem em i wok long stretim ol samting long ki-

rapim dispela skul.

Mista Tabar i tok gavman i luksave long dispela namba wan skul long Oro na i laik kirapim dispela skul.

"Mi bin go raun long Popondetta na toktok wantaim ol tisa long dispela skul. Gavman i gat plen long kirapim dispela skul, na mi laik askim sapos ol lida bilong Oro i ken wok bung wantaim gavman," Mista Tabar i tok.

Mista Juffa i tok Oro Provinsal gavman i lukim dispela sku olsem wanpela namba wan skul long provins na ol bai wokbung wantaim nesanel gavman long kirapim dispela skul.

Mista Arore i tok em i bin givim K500 000 kauntapat fanding mani pinis long kirapim dispela skul taim em i bin stap Minista bilong Haia Edukesen.

## 6-pela sip stilim si kukamba long Kiriwina

SEKYURITI sistem bilong PNG i no strong tumas na dispela i lukim planti ol sip bilong arapela kantri i kam stilim pis long solwara bilong PNG.

Las wik tasol, long solwara bilong Milen Be Povins, 6-pela sip i bin kam stilim ol pis klsotu long Kiriwina Ailan.

Milen Be Gavana, Titus Philemon, i tokim Palamen long Trinde olsem dispela 6-pela sip em sip bilong ol Esian kantri. Tasol em i no

tokaut stret long wanem ol kantri dispela sip i kam long en.

Mista Philemon i tok ol dispela sip i bin kam stilim si kukamba long solwara bilong Milen Be taim Nesanel Fiseris Atoriti (NFA) i stopim ol asples manmeri na ol arapela pisamen long kisim na salim si kukamba.

"NFA i tok no gat long ol asples manmeri i kisim si kukamba na salim. Tasol ol dispela lain i wok long kam stilim si kumba taim ol pipel i lukluk na stap," Mista

Philemon i tok.

Minista bilong Fiseris, Mao Zeming, i tok em i no bin harim dispela nius. Em i tok sekyuriti sistem bilong PNG i no strongpela tumas long glasim na holim ol dispela kain stilman.

Mista Zeming i tok gavman i wok long stretim tok-tok wantaim ol gavman bilong Indonesia long helpim PNG wantaim marin sekyuriti sistem we ol i ken lukim na holim ol dispela kain stil man i kam insait wantaim pising bot bilong ol.

**Dove Travel**

The oldest and most experienced travel agency in PNG

Try us for all your travel needs... local or international, we will not be beaten on price.

Call us on 325 9800 or call in to our office Cnr Angau Drive and Lahara Avenue, Boroko.

- Corporate travel is our specialty.
- Credit is offered to those companies who qualify.
- No hidden charges on airline bookings.
- Agents for Air Niugini, PNG Airlines and Qantas.

Ph: 325 9800 Fax: 325 1451 sales@dovetravel.com.pg



Liklik pikinini i redi long Ista...Ol papa mama i mas salim ol pikinini go long sios long dispela Ista. Ista em i no taim bilong dring bia, go danis long nait klab, na mekim ol arapela pasin no gut. Em i taim bilong go long haus lotu na tok tenkyu long Jisas i bin dai long rausim sin bilong yumi. Piksa i soim ol Sande Skul pikini bilong Evangelical Church of PNG (ECPNG) long East Boroko, Pot Mosbi.





# PIH Saveman Nius

"I kam long Pacific International Hospital Port Moresby"

Ph: 311 3000 and 799 88000 Website: www.pihpng.com

## The Truth about Tuberculosis - It is Treatable


### Tuberculosis in PNG

In Papua New Guinea, approximately 30,000 people every year are newly infected with TB. PNG has the highest rate of tuberculosis deaths in the Pacific region. TB remains a major public health problem, mainly in view of the current HIV epidemic, as a double burden (TB-HIV co-infection) and also the situation of multidrug-resistant TB (MDR-TB) is posing as a serious threat.

So, the need of the hour to combat this problem is promoting general awareness in the communities. Raising awareness about TB, what it is, how to prevent its spread can help check TB infection largely. It also involves setting up a system for recognizing infection, treating it, and reducing transmission from person to person. As TB is spread only from humans to humans, a person must be treated as soon as they contract it.

### What is TB?

Tuberculosis, commonly known as TB, is caused by bacterium Mycobacterium tuberculosis that often affects lungs. It is a contagious bacterial infection. TB is transmitted from person to person through air from the infected person when they sneeze, cough, spit or even speak. They propel the TB germs into air and when a healthy person breathes this contaminated air they can contract TB. TB can be fatal if left untreated.



These bacteria may also infect the Brain, Kidneys, Bones, Joints, Lymph nodes and Spine and this is called as **Extra Pulmonary Tuberculosis**.

Symptoms of extra pulmonary TB vary, but can include:

- Persistently swollen glands
- Abdominal (tummy) pain
- Pain and loss of movement in an affected bone or joint

- Confusion
- Persistent headache
- Backache
- Seizures (fits)

### Types of Tuberculosis


You can have active tuberculosis disease with symptoms or inactive tuberculosis infection that is dormant.

People with dormant tuberculosis infection have the bacteria in their lungs and test positive for the illness, but do not show any symptoms. People with active tuberculosis have symptoms and can transmit the disease to others; people with dormant TB cannot infect others but have higher chances of contracting TB.

### Symptoms

When a person develops TB of lungs, the symptoms may include:

- Persistent cough
- Cough with bloody sputum
- Loss of appetite
- Weight loss
- Sweat during night times
- Chest pain
- Breathing problems
- Weakness etc. These symptoms may prolong for many months.



### Who is at high risk of getting TB?

Tuberculosis can affect anyone, but some are at a greater risk of contracting TB than others.

- Elderly population
- Anyone with weak immune system, such as HIV patients, people with chemotherapy

- People with a poor diet
- Those living in unhealthy environment
- People who work or live with TB infected person

People with certain medical conditions like diabetes or malnutrition, usage of tobacco, alcohol or over dosage of drugs can contract TB due to weak immune system

### TB and HIV

Papua New Guinea has highest rate of people living with HIV. HIV infection has contributed a significant role in increasing the number of deaths relating to TB, it remains the most common cause of deaths in PNG. It is said that HIV infected people are 20 to 30 times more likely to get affected with TB.

### TB Prevention

Official Logo for 2016

The theme of World TB Day 2016 is "Unite to End TB"

### Vaccine - The BCG vaccine

The TB vaccine called Bacillus Calmette-Guerin (BCG) is one of the most extensively used vaccines for newborns and infants. The BCG vaccine has been shown to provide children with excellent protection against the disseminated forms of TB. There is a vaccine for TB for adults, but it does little to interrupt the transmission of TB among adults.

### Getting Screened for TB

It's very important to get regular health checks done by everyone to ensure good health.. Early detection can save life.

### TB Drug Treatment

TB drug treatment for the prevention of TB is also known as chemoprophylaxis. This can reduce the risk of active TB occurring in people either exposed to infection, or with latent TB. For TB prevention the WHO recommends the drug isoniazid should be taken daily for at least six months and preferably nine months. The main "target" groups for TB treatment for prevention are those most at risk of progressing from latent to active TB.

### Preventing TB transmission in Households

In order to reduce risk in households where someone has infectious TB, the following actions should be taken:

- Houses should be adequately ventilated
- Follow cough etiquette and respiratory hygiene, means covering your nose and mouth when coughing or sneezing
- Sleeping alone in adequately ventilated room
- Spend as little time as possible on public transport
- Avoid places where large numbers of people gather together
- Family members living with HIV should not provide care for patients with TB
- Keep children away from TB patients
- Use sterilised face masks

### TB is a curable disease- Get Screened and Take Treatment

It is very important that we realize the seriousness of TB and get screened. Infected people should finish the course of prescribed medicines. If a full course of anti-tubercular drugs is taken regularly, this disease is fully curable.

Discontinuing medication leads to developing drug resistance, which can be more difficult to treat in case of reoccurring TB. If you think you have been exposed to someone with TB disease, contact your health care provider or local health department to see if you should be tested for TB infection. Be sure to tell the doctor or nurse when you spent time with the person who has TB.

Government of Papua New Guinea is striving hard to battle TB in the country- and is offering many preventive and treatment programmes in the communities. However, this effort can be more successful only when individuals, families and communities come together and get proactively involved in fighting TB to make PNG a TB-free country. Let's Unite to End TB.

**Wishing PNG a Happy Easter, blessed with health, peace and prosperity!!**



**24<sup>TH</sup> MARCH  
WORLD  
TUBERCULOSIS DAY**

**TB CAN INFECT OTHER PARTS OF YOUR BODY NOT JUST THE LUNGS!**  
Chronic symptoms of headache, backache, vision disturbances, stomach-ache may all be indicators of TB.

**PIH IS OFFERING  
TB HEALTH CHECK  
AT JUST**

**PGK 199\***

\* Offer valid till limited period



Pacific International Hospital : Sec 105, Lot 2, Taurama, 3 Mile, Port Moresby, PNG, Ph: 799 88 000  
PIH Clinic : Ground Level, Vision City Mega Mall, Waigani Drive, Port Moresby, PNG, Ph: 7 100 2873  
info@pihpng.com | www.visioncity.com.pg | www.pihpng.com | www.facebook.com/pihpng @pihpng





# Meri i yusim SME mani long narapela rot

**WANPELA meri i yusim mani bilong Small Medium Enterprise Scheme (SME) bilong gavman long narapela rot na ol polisman long Galp i painimaut na holim pasim em.**

“Ol lain husat i kisim SME mani i mas yusim long wanem kain rot ol i sapos long yusim long en, na givim ripot i go bek long gavman long abrusim lo bilong holim yupela,” Het bilong Kraim Dairektoret bilong Konstabuleri na Ekting Asisten Komisina, Victor Isouve i tok bihain long bikpela stil pasin i kamap insait long Galp Provinsal Gavman.

Isouve i mekim dispela toktok bihain long wanpela meri, Maria Lalori, i yusim K30, 000 bilong Galp Provinsal Gavman long narapela rot na ol polis i holim pasim em na sasim long Tunde, 15 Mas 2016, bikos em i brukim lo aninit long Seksen 383A bilong Kriminal Kod Ekt we em i bin yusim long narapela rot.

Lalori i gat 35 kris-mas na em i bilong Moveave viles long Malalaua, Galp Provins, i bin kisim K30, 000 long kamapim wanpela poltri projek long arere bilong wara Lakekamu long Galp

provins, tasol em i no kamapim dispela projek.

Galp Provinsal Gavman i bin baim dispela K30, 000 i go long Lalori aninit long Provinsal Gavman sek namba 948 long 11 Me, 2012.

Lalori i opim wanpela nupela benk akaun na em i putim dispela sek long Benk. Long wankain taim, em i rausim olgeta mani na pasim dispela akaun long wankain de.

Provinsal Treseri i askim Lalori planti taim long givim ripot bilong dispela mani, tasol dispela ripot i no kamap na ol i painimaut olsem Lalori i no

kamapim dispela projek.

Ol i bin toksave long polis long mekim wok painimaut long dispela hevi na ol polis i holim pasim em na sasim em.

“SME program bilong gavman i kamap bikpela long gutpela rot, tasol ol lain husat i kisim dispela pablik mani i mas yusim long stretpela rot na mekim wok,” Isouve i tok.

“Dispela em i namba wan still pasin i kamap long SME program na ol i lukluk klostu long SME mani we gavman i givim aut long ol wan wan lain long kamapim projek.”



**GCCI Presiden Sarah Shelley wantaim poils man na memba bilong GCCI, Michael Gotaha i prisenim sekmani i go long ol IEHP polis meri las Fraide long Goroka Polis stesen. Foto: GSSI**

## Ol meri polis long Isten Hailans kisim helpim long konprens bilong ol

SAMTING olsem 26 polis meri long Isten Hailans bai stap insait long konprens bilong ol polimeri long kantri neks bai kamap long Lae, Morobe provins long neks mun, Epril.

Helpim long wokabaut bilong ol meri i wok long go het nau, na long las wik Fraide, ol meri i bin kisim K1,000 donesen i kam long Goroka Samba ov Komes na Industri (GCCI). Dispela mani bai

helpim ol meri long ran bilong ol long PMV bas long Goroka i go daun long Lae, na i go bek gen, na tu, wantaim ples bilong slip long en. Nupela Presiden bilong GCCI, Sarah Shelley, i bin prisenim K1,000 mani donesen i go long Kodineta bilong Isten hailans meri grup long Goroka Polis stesen.

Ol polis meri i bin amamas tru long helpim ol i kisim na ol i salim bikpela tok tenkyu

i go long GCCI na tu, wanwok polis na memba bilong GSSI, Michael Gotaha long givim luksave long ol meri na givim ol sapot we i soim olsem ol i lukim dispela 2016 konprens bilong ol polimeri na stap bilong ol insait long bung olsem wanpela bikpela samting. Het tok bilong b u n g em, “Strongim ol polimeri long karimaut gut wok” na konprens bai pulim ol polimeri

i makim olgeta provins long kantri bilong bung wantaim mna toktok long ol samtiung i karamapim ol.

26 polimeri bilong Isten Hailans bai makim provins bilong ol.

Dispela konprens em i sans bilong ol polis meri long lukluk, glasim na skel;im ol salens i save bungim ol.

I gutpela long gat moa meri polis sapos ol loman i laik strongim wok bilong daunim seksuel na jenda beis vailens.

## Polis risos i sot long Sentral Provins

### ...polis ino inap wok gut

BIPELA hevi olsem stil pasin, kilim man i dai na reip i kamap bikpela long Hiri rijon bilong Sentral Provins bikos polis i sot long ol samting long stopim ol dispela hevi.

Komanda bilong Bereina Polis Stesin, Philip Weka, i tok aut long ol dispela hevi long ol memba bilong Polis Midia Yunit, husat i go long Galp na ol narapela hap bilong Sentral provins long lukluk long ol hevi na ripot long ol salens we ol polis long dispela ol ples i bungim.

Weka i stap inap 20 yia long wok bilong em long Bereina Distrik i tok, “Hevi i save kamap long olgeta komyuniti na ol pipel i save yusim ol lo na rot

bilong komyuniti long kamapim bel isi namel long ol lain i kamapim birua pasin na ol lain i save bungim hevi.

“Polis i ken go wantaim lo bilong kantri na stretim ol hevi tasol i no gat inap polisman long kisim strong, na tu ol narapela risos bilong yusim na stretim ol hevi i sot. “Ol hevi i go bikpela long rijon bikos ol yangpela man na meri wantaim i save kisim drag na dringim hom bru.”

Weka i tok moa olsem ol yangpela lain husat i save kisim drag i save kamapim nupela hom bru ol i save kolim “steaming pure petrol” i minim olsem “dring wantaim petrol na pulim i go insait

long nus paip bilong ol”.

Em i soim wari bilong em olsem i no gat inap polisman i stap na ol samting bilong kisim sapot i sot, na polis no inap long stretim dispela hevi.

“Mi gat 10 polisman wantaim ol narapela wokman bilong polis stesin i save go long Kairuku, Kuni, Mekeo, na Not Mekeo eria tasol populesen i moa long 50, 000,” Weka i tok.

“Planti taim, polis i no save harim wari bilong ol komyuniti insait long Not Mekeo na Hula bikos ol i gat wanpela polis kar tasol na ol i no gat dingi.

“Wan wan taim, ol lain husat i bungim hevi i save redim

transpot long rot o solwara, bilong ol polis long harim warim bilong ol.

“Long klostu taim, i gat tupela hevi bilong dai i kamap na ol i ripot olsem wanpela i kilim em yet long Inawi viles bikos em i save kisim drag. Wok painimaut bilong polis bai stat inap ol i kisim wari bilong ol lain long eria.”

Wankain taim, Doa polis i bungim wankain salens we ol i lukautim bikpela populesen insait long Doa Raba Plantasin.

Na tu, ol i kontrolim trefik bilong Hiritano Haiwe we planti hevi i kamap namel long ol polis na ol lain i salim buai bikos buai i stop long NCD.

## Bikpela salens i stap yet bilong go insait long ol Kolis na Yunivesiti

**Ted Wika Kaleo i raitim**

BIPELA salens i stap yet long olgeta yia bilong go insait long ol bikpela instituson bilong kantri bihain long pinisim gret 12.

Eksekutiv Menesa bilong Teseri Edmisen na Skolasip Divisen bilong Dipatmen bilong Haia Edukesen, Thimon Bune, i tok long lonsing bilong Absolut Intenesenel Edukesen Ekspet-PNG (AIEE-PNG) long las wik

Fraide olsem moa long 200 000 gret 12 sumatin i save resis long wan wan yia bilong kisim liklik ples i stap long ol kolis na yunivesiti long kantri.

“Planti sumatin i save kisim gutpela maklong pepa bilong ol tasol ol i no inap long kisim wanpela ples long stadi yet bikos i no gat inap spes,” Bune i tok.

“Las yia, 22, 289 gret 12 sumatin i mekim test tasol, namel long 5000

inap long 6000 i kisim ples long ol kolis na yunivesiti.

“I no gat wanpela sans na rot i stapo bilong putim ol narapela sumtain long ol narapela skol.

“Tasol ol i kamapim nupela kolis na yunivesiti olsem Westen Pasifik Yunivesit na PNG Open Yunivesiti em ol sampela rot we gavman i kamap wantaim long putim ol sumatin long skol.”





# Papa mama mas lukautim gut pikinini

**OL papa mama i mas lukautim ol pikinini gut na no ken larim ol i go dring bia o smukim mariwana long dispela lsta taim, Oposisen Lida Don Polye, i tok.**

Mista Polye i tok ol papa mama i mas rispektim ol pikinini bilong ol na kukim gut-pela kaikai na givim ol na lukautim ol gut.

“Kaikai em i namba wan samting long laip bilong manmeri. Long laip bilong ol yangpela pikinini, kaikai i save mekim bikipela wok

long groim na helpim ol pikinini i kamap strong na abrusim ol kain kain sik no gut,” Mista Polye i tok.

Em i salensim ol papa mama long no ken karim planti pikinini klostu klostu sapos ol i skelim olsem papa mama i no save mekim bikipela wok mani o sapos ol bai bungim hevi long lukautim ol pikinini.

“Karim pikinini long mak na skel bilong yu long lukautim ol gut. Sapos yu mekim gut-pela wok mani na sin-

daun bilong famili bilong yu i stap gut, ol pikinini yu karim tu bai stap gut.

“Sapos laip bilong yu i no stap gut na yu save kaikai drai skon na kol wara, no ken tingting long karim planti pikinini bikos bihain taim bilong dispela pikinini bai no inap stap gut,” Mista Polye i tok.

Mista Polye i laikim ol yangpela manmeri long kamapim gutpela sindaun, bihainim ol toktok bilong dokta na ol haus sik lain, no ken

bagarapim bodi wantaim drak, bia na pamuk pasin, go eksaisais na stap gut, na bihainim tok bilong God.

“Ol papa mama mas skulim ol yangpela pikinini bilong ol long dispela we.

Ol i mas givim gutpela kaikai long ol pikinini. Ol pikinini i mas gat gutpela edukesen, ol i mas gat gutpela helt, na papa mama i mas givim ol sampela samting ol i nidim long laip,” Mista Polye i tok.

# Giburi yut bai klinim Morata haus sik



Namba wan wok ol yut i mekim i lukim Giburi Strit i kamap klin na nais tru.

**OL yut bilong Giburi Strit long Morata 1 i laik klinim Morata haus sik, yut lida Allan Titus i tok.**

Mista Titus i tok ol yangpela manmeri i laik klinim Morata haus sik bikos ol i gat bikipela ting ting long helpim dispela haus sik.

Mista Titus i tok ol manmeri i save kisim helpim long dispela haus sik tasol planti taim ol i no save givim sampela samting i go bek gen long haus sik.

“Taim mipela i kisim bagarap, mipela i save ran i go long haus sik.

Taim ol wok lain bilong haus sik i givim marasin na pinisim sik bilong mipela, mipela i no save ting ting long go bek gen long haus sik na helpim ol,” Mista Titus i tok.

Mista Titus i tok ol yangpela manmeri bilong Giburi Strit i luksave olsem haus sik em i wanpela namba wan samting long komyuniti na ol i laik nau klinim ol rabis insait long banis bilong haus sik na larim ples i stap klin na nais.

“Mipela i gat wanpela liklik asosiesen i stap. Nem bilong dis-

pela asosiesen em i Guburi Yut Empowerment Inc. Mipela ol yut long Giburi Strit i laik senisim pasin na kamap gutpela manmeri long komyuniti bilong mipela,” Mista Titus i tok.

Em i tok namba wan komyuniti wok bilong ol bin kamap tupela wik i go pinis, na dispela i bin lukim ol yut wantaim ol papa mama i bungim han wataim na klinim Giburi Strit.

“Neks wiken mipela i tingting long klinim Morata haus sik. Em i komyuniti wok na

mipela i laik givim i go bek long haus sik. Haus sik stap na manmeri i stap. Tasol planti taim mipela i no save helpim haus sik, maski haus sik i save helpim mipela planti taim.

“Mipela i toksave pinis long ol haus sik wok lain na ol i wanbel stret long mipela. Neks wiken bai mipela i go klinim Morata haus sik, na em bai kamap namba tu komyuniti wok bilong mipela,” Mista Titus i tok.

# Digicel Foundation helpim Laloki Saikaitrik haus sik

**Nicky Bernard i raitim**

**BIHAIN** long 50 yia. Laloki Saikaitrik Haus sik o haus sik bilong ol lain i gat sik long het i kisim wanpela helpim i kam long wanpela faundesen.

Laloki haus sik i no save kisim helpim i kam long gavman long wanem dispela haus sik i no gat bod bilong em long ranim haus sik.

Ol save kisim liklik helpim tasol i kam long bikipela Jenerel Haus sik long Pot Mosbi. Dispela i mekim ol wok manmeri long haus sik long Laloki save wok hat long lukim na helpim ol sik manmeri long hap.

Laloki haus sik em ples bilong lukautim ol man-

meri husat i gat sik long het, tasol ol manmeri long dispela liklik hap i save kam painim helpim long taim ol i sik long wanem, bikipela haussik long Mosbi i stap longwe.

Dispela i mekim ol wok manmeri long hap i kamapim liklik spes long olpela opis bilong ol i kamap liklik klinik long lukautim ol famili bilong ol wok manmeri sapos ol gat sik.

Dispela liklik klinik i save pulap olgeta de long wanem ol manmeri na pikinini klostu long hap i save go painim helpim long marasin taim ol i sik.

Digicel Foundation i raun na go lukim Laloki

Haus sik, na lukim olsem dispela liklik klinik i no inap long lukautim ol manmeri long Laloki. Olsem na wantaim helpim bilong ol bod bilong Digicel Foundation, ol i helpim long mekim wanpela liklik klinik wantaim fanding inap long K21,000.

Dispela liklik klinik i gat tupela bed, wanpela liklik hap bilong kisim marasin na wapela liklik opis bilong sista na bikipela spes bilong ol manmeri na pikinini long sidaun long wetim marasin.

Digicel Foundation i bin go opim dispela liklik haus long klostu 50 yia aniveseri bilong dispela haus sik long las wik Fonde.



Dokta Lasavati Daugunu i pinis long lukluk insait long nupela klinik.



Digicel Foundation Bod wantaim menesa bilong klinik Sista Cathy Mokoko i sanap fran long nupela klinik.



Sampela bilong ol man i gat sik long het i sindaun wantaim yelo t-siot. Ol poto Nicky Bernard



# “Save na mekim”

I kam long liklik buk, Stori na Wok,  
Elizabeth Cox i raitim

## Bosim Gut Gaden Na Graun

**Toksave:** Long ol gaden kaikai bilong tumbuna i gat wanpela bikpela hevi. Yumi save kiliaim na kukim olgeta bus na graun i save kamap ples klia. Sapos bikpela san na ren i pundaun long dispela graun bipo yumi planim nupela kaikai, sampela gris bilong graun i sve lus pinis. Dispela samting i save kamap moa yet long ples maunten. Taim bilong bikpela ren, yumi inap lukim baret i kamap na ol gutpela blakpela graun i bruk na go pinis. I gat kain kain we yumi inap long bihainim long pasim dispela kain trabel long kamap. No ken kukim tumas ol pipia taim yumi daunim bus. i tru olsem yumi mas kukim sampela bikpela diwai, tasol ol drai na sting lip bilong graun ol i gris bilong gaden. Sapos yu kukim, na sit bilong paia tasol i stap, ren i

ken rausim ol gris long gaden. i gutpela tu long slipim ol diwai arere long maunten long pasin graun long go daun. Sapos yu dikim ol bet o risis ol tu mas go arere long maunten. Sapos ol i go daun bai bikpela ren i spit i go daun long baret na brukim graun na karim i go. Yumi ken traim na lusim ol ples i gat bikpela, bikpela maunten tumas na wokim gaden long hap ples i stret o “flat” liklik. Sapos ples bilong yu i maunten tasol yu ken planim gen sampela nupela diwai namel long gaden long holim gut graun. Kompos, na mals na rotesin (o senisim ples bilong kaikai) i save helpim yumi long bosim gut graun tu. Ol Meri Inap Long Mekim Wanem? Ol mama i ken soim gutpela save long ol papa na pikinini long

traim na tambu long kukim tumas ol pipia long nupela gaden. Sapos yu wok long ples kunai, na yu kukim olgeta taim, graun bilong yu bai kamap nogut tru. Hipim ol kunai na ol drai lip na putim bek antap long gaden yu dikim pinis. Long ples maunten ol mama mas raunim maunten long wok gaden. No ken wokim bet na baret i ran i go daun. Planim nabaut ol gutpela diwai bilong frut o paiawut insait long gaden long maunten long pasim gut graun. Sapos yu laik planim kes krop (cash crops) – no ken oltaim yusim nambawan graun na larim ol ples nogut na rabis graun long kirapim gaden kaikai. Wokim kompos, malsim gaden na senisim ples bilong kaikai na bai dispela gaden bilong yu i gat gris na kamapim gutpela kaikai long planti yia.

## Trenspot sekta sapatim ol meri long menesmen level



Bessie Andrew (namel greduet), Clement Kapapal em CEO bilong PNG Air Services na Roy Mumu em long lephan (A/CEO PNG Air Services).

**TRENSPOT sekta long PNG nau i lukim ol meri i kisim ol wok long menesmen level.** Bessie Andrew i wanpela long ol na nau nau em i pinisim kos na greduet long tupela yia long wanpela join Papua New Guinean/Australian tupela yia Senia Eksekutiv Developmen Program. Dispela join program i bin stat long Intenesenel Wimens de long 2014 na em i hap bilong patnasip program namel long gavman bilong PNG na Australia. Program ya i laik divelopim ol meri senia eksekutiv long trenspot

sekta insait long dispela kantri. As tingting em long sapatim ol meri long go insait long wok bilong plenim, menesmen na lukim ol projek na polisi long trenspot sekta i karim kaikai. Sapot long dispela program i bin kam long ol trenspot sekta ejensi long Canberra long Australia yet, ol lain long PNG na long sait bilong PNMG gavman, sapat i bin kam long Seketeri bilong Dipatmen bilong Trenspot, Ray Mumu, OBE na Menesing Dairekta bilong PNG Air

Services Ltd (PNGASL), Kepten Ted Paki. Bihain long greduesen bilong em, ol i makim Mis Andrew long senia eksekutiv posisen na memba bilong Eksekutiv Komiti long PNGASL. Dispela program mekim bikpela wok long promotim moa meri long kisim wok long menesmen level insait long trenspot sekta long dispela kantri. Nau ol i laik kisim gen ol nupela lain i go insait long program, tasol wok bilong ol i mas gutpela na tu, ol i mas soim olsem ol i gat komitmen long wok.




### TRUSTEE FOR THE DEFENCE FORCE RETIREMENT BENEFIT FUND REMINDER TO PENSIONERS

CTSL will be conducting its annual checklist suspension exercise by April 2016. Pensioners are reminded to complete an updated pension renewal form and forward to us to avoid having their pensions suspended. (Update form is enclosed)  
The following pensioners are required to contact the Trustee's office as soon as possible to update their records. Beneficiaries and relatives of pensioners are also encouraged to contact the office to confirm their status as we are in the process of closing their files.

| NO | NAME                   | NO | NAME                     | NO | NAME                   |
|----|------------------------|----|--------------------------|----|------------------------|
| 1  | ALPHONSA YAKERI        | 19 | JULIE ALINGHAM           | 37 | SAIDAM JOHN            |
| 2  | ALQUIN TONAMATAGRA     | 20 | KEIKI AUGUSTINE          | 38 | SALOME IAMARCH AMOS    |
| 3  | ARMELA ROPLAEN         | 21 | KINGSTON WAKIWAKI        | 39 | SAMSON ANDOGA          |
| 4  | CAMILUS DAU            | 22 | KLENGLI NEESKIENG THOMAS | 40 | SELINA SEREMU          |
| 5  | COLLETTA NONI          | 23 | LARI SIADA               | 41 | SEMBISEN LUCY MATHIAS  |
| 6  | DARUSILLA NANUK KILALA | 24 | LAURIKO MOKE             | 42 | SILIH SO-ON            |
| 7  | DAVID OROHO            | 25 | LAVIRIU BLAISE THEODORE  | 43 | SIMARAN LEVI           |
| 8  | DILIGIATO GINIYA       | 26 | LINUS MANOI              | 44 | SIMOI MAKULE           |
| 9  | DINGA WERAGE           | 27 | LULU KAIA                | 45 | SOLOMON SAVO           |
| 10 | EFI PETNAIS ANNE       | 28 | MANA FOBBEY              | 46 | TAPU SAM WAKU          |
| 11 | ELIZABETH VIRIU        | 29 | MARY KAIEH               | 47 | ULARI SAVA             |
| 12 | GABRIELLA BULEAKA      | 30 | MASPOK JOSPINE           | 48 | VERONICA KAMANE        |
| 13 | GODWIN TOVUE           | 31 | MATHEW YAWI              | 49 | WAUS URAKE MIKA        |
| 14 | GORIN TULE             | 32 | MUNGE ROY MUZAMET        | 50 | WILLIMAINA WANINARA    |
| 15 | HARRY BROWN KOPA       | 33 | MURO JOFO                | 51 | WOWO WENA DAMBA        |
| 16 | JACK MAIERA            | 34 | PALA AUGUSTINE           | 52 | WOYENG SOYENY BENEDICT |
| 17 | JIM ZERLINDA           | 35 | RENGEPE ROPI             | 53 | YAVIRIR JOHN ARIAKA    |
| 18 | JONAH WEMALO           | 36 | RULDOF TURBAT            |    |                        |

Contact Member Services officers on the following telephone and fax Numbers: PH 3203455/79987900/1801007 - Fax 320 1710 /321 5840  
Email us at the following address: [benefits@ctsl.com.pg](mailto:benefits@ctsl.com.pg) or visit us at [www.ctsl.com.pg](http://www.ctsl.com.pg)  
Our office is located at shop 2, Ground Floor of Defence Haus, Corner of Hunter and Champion Parade, Port Moresby and Comrade Haus, off Frangipani Street, Hohola, National Capital District.

Authorized by  
**RICHARD SINAMOI**  
Chief Executive Officer



### COMRADE TRUSTEE SERVICES LIMITED

TRUSTEE FOR THE DEFENCE FORCE RETIREMENT BENEFIT FUND  
P.C Box 457, Port Moresby, Phone: 1801007/3203455/79987900 Fax: 3201710 Email: [benefits@ctsl.com.pg](mailto:benefits@ctsl.com.pg)

#### PENSION PAYMENT RENEWAL FORM

- Pensioner Name:**   
 Service Number:  Pension Number:   
 Date of Birth:  /  /  Date of Discharge:  /  /
- Type of Pension** (Please Tick appropriate boxes )  
 Retirement  Wicow  Child  Medical  Power of Attorney (POA); if yes...  
 Name of POA:   
 Relationship to Pensioner:
- Address & Contact Details**  
 Postal Address:   
 Residential Add:   
 Land Line:  Mobile:   
 Fax:  Email:
- Bank Account Details**  

|                 |                      |
|-----------------|----------------------|
| Account Name    | <input type="text"/> |
| Type Of Account | <input type="text"/> |
| Account Number  | <input type="text"/> |
| Bank            | <input type="text"/> |
| Branch          | <input type="text"/> |

Pensioners Signature: \_\_\_\_\_ Date: \_\_\_\_/\_\_\_\_/\_\_\_\_

**Office Use Only**

|                          |                      |                  |
|--------------------------|----------------------|------------------|
| <b>CTSL</b>              |                      |                  |
| Received by              | Date: ____/____/____ | Signature: _____ |
| Checked by:              | Date: ____/____/____ | Signature: _____ |
| <b>KISS</b>              |                      |                  |
| Checked and Verified by: | Date: ____/____/____ | Signature: _____ |

**Notes:** \_\_\_\_\_



# Bogenvil hevi buk i gat lesan long olgeta



**Pater Janusz Skotniczny SVD, Bruder Szymon Powol SVD wantaim raita bilong buk, Veronica i harim ol lain i toktok long taim bilong lonsim buk. Foto: Nicky Bernard**

NUPELA buk long Bogenvil i kamap sotpela taim i go pinis i gat mesej o tokskul long olgeta, Pater Janusz Skotniczny SVD, em Siaman bilong Word Pablisng Kampani na Tresera bilong ol Di-vain Wod Kongriksen (SVD) long PNG, i tok.

Em i bin wokim dispela toktok long moa long 200 pipel i bin bung long taim bilong lonsim buk ol i kolim "Behind the Blockade, long Gren Papua Hotel long Mosbi long Febueri 26, 2016.

Yumi lukim na harim planti gutpela toktok long pablik na long sampela ovasis lain long dispela buk.

Tasol long toktok bilong Pater Janusz, "dispela buk i bringim yumi klostu tru long situesen na stap bilong humen krais o hevi, long olgeta sait.

"Bogenvil em i wanpela naispela ples long wol, tru true m paradais, tasol long Mas 4, 1994, raita i tok olsem, hel i bruk lus stat long tude."

"Em i rekot (bilong stori) long pen, pret, wari, laik pasin, strong bilong meri, pikininiu meri, mada, Kristen, bilong Bogenvil. Em i rekot long ol hevi na rot long stap laip, holim long bilip pasin na laik bilong ples na ailan.

"Dispela em i piksa stori bilong planti tausen narapela meri husat i serim wankain ekspirien.

Yangpela belmama klostu i karim, stap wantaim ol narapela ol i kisim olsem ol kalabus lain, fosim ol long wok-

about, karim pikinini long rot, ol i tok bilas long ol mama na lap long ol bikos ol i mama, lapun na sik tasol i no inap kisim helpim bikos i no gat marasin long helt senta long wanem, bloket i stap.

"Stori i tok long ol ples lida na sif i traime hat long stretim ol grup i birua nap ait long pis toktok.

"Stori bilong ol rilijes lida olsem Pater Dario Monegatti SVD, wanpela SVD pater bilong kantri Itali husat i yusim baisikel o wilwil long raun mekim wok long kamapim sekan na wanbel na belgut pasin, maski ol i bilong wanem sait, i kisim wankain luksave olsem ol i pikinini bilong Bikpela.

"Dispela buk, olsem Anna Solomon i tok long buk rivi bilong em, em i wanpela buk yu mas ritim- em i risos buk bilong olgeta. Long rot stori i kam long en, yumi wanwan i ken painim ples na tok dispela em mi long bloket long Bogenvil," Pater Janusz i tok.

Em i tok buk i gat skul tok long olgeta.

"Long ol bisnis pipel na ol kampani-long tingim na putim pipel long sait bilong tumbuna, kalsa na spirituel na profit o winmani bihain. Mi bilip olsem gavman bilong tude i tingim pipel na intres bilong ol na envairomen pastaim we i no olsem long 1980s;

"Long ol tredisenel lida-long luksave long velyu na pawa ol i gat long stopim ol birua na givim skul long ol yangpela jeneresen long

wokim samting stret long kontrolim ol samting i stat long ol liklik samtiugn bipo ol i kamap bikpela long krais level;

"long ol spirituel lida-long skulim velyu bilong Gutnius long tok na pasin, long stap wantaim ol pipel na pilim ol kain hevi na pen, ol amamas na gutpela taim long laip, long kra i wantaim ol dispela i kra i, long amamas wantaim ol na sori wantaim ol. Long skulim ol long gutpelas pasin bilong laip long sios na komyuniti;

"Long ol politisen-long go pas na lukautim kantri wantaim komitmen bihinim mama lo long ol pipel ol i sevim, na lukautim ol tarangu na stopimol birua i kamap long pasin korapsen;

"Long ol yangpela jeneresen- long luksave olsem laip i moa impoten long mani na ol i mas kisim mani long gutpela na stretpela rot long hatwok wantaim sapot long edukesen, ol samting ol i gat em bikos long hatwok na sakrifais bilong ol papamama, ol family, ol lida na pastaim tru, long Bikpela i mekim yumi, em Lod God;

"Long ol famili, ol papa, ol mamakamapim hom o famili haus long ol helti pikinini i go long skul na redi long spirituel sait long mekim ol stretpela na rait disisen na "Long yumi olgeta-long kamap ol Gutpela Samariten- gutpela pipel bilong Bogenvil- long taim bilong hevi na nid," Pater Janusz i tok.

# Tok sori na tanim bel: Pater Victor

**EM i taim bilong glasim wokabaut bilong Jisas na bilong yumi tu, tok sori na askim Bikpela long pogivim yumi, kisim nupela laip wantaim Jisas na amamas long jisas i kirap bek.**

Jenerel Seketeri bilong Konpres bilong ol Katolik bisop long PNG na Solomon Ailan, Pater Victor Roche, i wokim dispela toktok long lsta toktok bilong em i go aut long ol Katolik pipel na jenerel pablik insait long kantri.

"Long dispela wik, em i gutpela taim long lukluk bek, glasim na skelim laip bilong yumi.

"Sampela long yupela i ekspirien pasin we ol gutpela

pren stret i wokim no gut long yupela, olsem tasol i bin kamap long Jisas taim Judas em tresera we ol i trastim em i bin wokim olsem long em.

"Sampela long yupela i ekspirien pasin we ol gutpela poroman stret, ol hauslain o bos long wok i sutim tok long yuupela olsem tasol ol i bin wokim long Jisas na kilim em i dai.

"Yu tu i ken tingim ol taim we yu bin tanim baksait long Bikpela, famili na ol poroman, o ol taim yu bin wokim bikpela asua.

"Bikp[ela i bin pogivim yu taim yu tok sori olsem dispela stilman long diwai kruse. Na yu pogivim tu ol

arapela. Long lsaip bilong yumi, yi save ekspirien-sim ol Gut Fraide, tasol olgeta taim, i gat lsta we bai yumi kirap bek gen," Pater Victor i tok.

Em i toik Holiwik we yumi stap nau long en em i wanpela impoten na bikpela wik long ol Kristen Sios kalenda.

"Ol bin save kolim "Great Week" bikos ol bikpela samting insait long histori bilong salvesen i bin kamap long dispela wik moa long 2,000 krismas i go pinis.

"Long Pam Sande, ol pipel long Jerusalem i bin kisim Jisas i go long prosesio wantaim ol pam.

Long Santu Fonde, Jisas i bin sindaun long



**Pater Victor Roche**

laspela kaikai n kamapim sant Yukarisia na wok pater Judas i bin tanim baksait long em (Jisas na ol i salim em (Jisas long dai.

Long Gut Fraide, ol nilim em long Diwai Kruse na long lsta sande, em i bin kirap bek long indai. Em i win bilong em long da na sinpasin," Pater Victor i tok.

Amamas bilong lsta go long yupela olgeta



**BIKPELA SELEBRESAN: Wanpela bikpela lotu selebresen i bin kamap long Sen Peter Sanel Katolik Sios, Erima long kamap dikon bilong wanpela semieri na ol pater wantaim ol alta boi i prosesio i go insait long sios long statim lotu. Foto: Anna Solomon**



**AMAMAS, DANIS NA SINGSING: Ol lain Katolik grup bilong Sentrel Provins i wokim tumbuna klalserel danis na singsing long amamasim selebresen long wanpela semineri long peris i kamap dikon. Foto: Anna Solomon**



# Skelim bilip bilong yumi wantaim pasin na ol wok yumi mekim



## KOMENTRI

DISPELA wik em i bikpela de long kalenda bilong ol Kristen bilip manmeri long wol. Em i taim bilong tingim ol pen na hevi bilong yumi Jisas i bin karim inap em i dai long baim bek yumi ol manmeri bilong sin.

Planti ol Kristen i wok long redi long dispela wik. I gat ol program bilong lotu na pre na go lukim ol lain i sik na stap long haus sik o long kalabus na givim kaikai long ol tarangu.

Sampela sios i gat spesel ofa long dispela taim long mekim wok bilong helpim ol tarangu manmeri.

Ol dispela wok marimari i soim trupela Kristen pasin we yumi harim Gutnius na bihainim long ol pasin yumi soim long ol arapela brata susa. Em i mak bilong bilip bilong yumi wan wan.

Mani na biknem na ol samting bilong graun tasol bai i no inap long helpim yumi, nogat.

Ol pasin bilong yumi em i wanpela mak bilong skelim sapos yumi stap tru olsem ol Kristen o nogat.

Papua Niugini i tokaut pinis olsem yumi wanpela Kristen kantri. Yumi amamas long dispela bikos em i tru.

Tasol pasin bilong yumi long ol arapela brata susa i sotim dispela mak yumi putim long nem bilong kantri. Tude i gat ol hevi bilong lo na oda i stap yet. I no gat rispek



Ista... Taim bilong tanim bel  
long laip na propeti bilong ol narapela manmeri, yumi i no givim han long ol lain i nidim helpim, yumi askim long pe long

ol liklik wok yumi inap long mekim fri. Dispela em ol liklik samting tasol i soim olsem pasin bilong yumi i no senis yet.

I gat ol bikpela wok i kamap long kantri, tasol ol dispela bikpela wok olsem moa rot na haus na skul na ples bilong pilai inap long helpim moa pipel bilong PNG o nogat.

Ol dispela samting i kamap long ol arapela senta o i stap tasol long Mosbi na ol arapela bikpela siti.

Ol bikpela disisen we moa mani i mas go long strongim pawa bilong ol politisen em narapela askim yumi ken skelim. Hamas milien pipel bilong PNG bai benefit long ol dispela disisen? Na hamas moa milien Kina bai kantri i tromoi long lukim ol dispela disisen i karim kaikai.

Long dispela wik yumi harim olsem mak bilong populesen i stap namel long 8 na 10 milien pipel.

PNG inap long lukautim gut sindaun bilong dispela populesen long bihainim taim o

nogat. Ating yumi mas skelim ol dispela samting bipo long yumi tok yes tasol long spendim mani long ol samting i no inap helpim sindaun bilong ol pipel.

Pasin bilong bungim ol samting bilong graun na sekap long benk akaun bilong yumi bai i no inap long helpim yumi long taim bihainim.

Ol dispela kago inap long pasim ai bilong yumi long lukim ol lain husat i sot tru long samting. Ol inap long stopim yumi long soim trupela Kristen pasin long ol brata susa.

Nau em i gutpela taim tu long sarap na skelim tingting na laip bilong yumi wan wan. Ol samting i stap stret o sampela hap i krungut liklik. Yumi inap long helpim ol arapela long wanem kain rot?

Dispela wik yumi lukim piksa na lekmak bilong Bikpela na skelim laip bilong yumi wantaim bilip bilong yumi. Yumi inap long bihainim lekmak bilong em o nogat?

Em i bin kam daun long graun olsem man nating na long laip bilong em i no gat ol bisnis o biknem.

Tasol tude, planti milien Kristen long wol i bilip long em.

Orait yumi mas soim Kristen pasin long ol arapela brata susa long dispela taim na stap isi long taim bilong Ista.

### Tok klia long hamas mani skul bai kisim long TFF na DDA long kamapim projek

LAS wik Minista bilong Edukesen Nick Kuman i salim wanpela pas long olgeta skul na skul bod long ol i no ken sasim projek fi.

Na sapos ol skul i kisim projek fi long ol sumatin long stat bilong skul ol i mas givim bek mani bilong ol sumatin.

Dispela em bikos Kuman i tok Gavman bai helpim long givim projek fi, sampela long TFF na sampela long Distrik Developmen Atoriti. Dispela i gutpela nius long ol papamama.

Kuman i tok ol skul i ken kisim mani long tuition fee fri (TFF) mani long kamapim ol projek na moa yet ol i ken aplai long Distrik Developmen Atoriti (DDA) long mani long kamapim projek bilong ol. Dispela i gutpela tok tu.

Tasol hevi nau em ol skul i no klia hamas mani tru ol i mas yusim long TFF na hamas mani tru em DDA i makim bilong ol skul i aplai



long yusim.

Dispela tok i paul na olsem Kuman na Edukesen Dipatmen i mas klia long dispela.

Long pas em i tok em i skelim na givim pinis K49.6 milien, las TFF hap mani bilong las yia em i bin holim i stap. Na bai em brukim na skelim K602 milien mani bilong 2016 i go aut tu.

Long dispela, K75 milien em bai mekim long namba wan term.

Dispela i gutpela nius tu.

Tasol hevi em olsem maski em i tok em givim pinis mani, sampela skul i tok ol i no kisim yet dispela

mani. Na sampela i tok ol i no kisim olgeta mani ol i bin askim long em, bihainim namba bilong ol sumatin ol i gat long em.

Sapos kain tok i kamap, husat tru mipela i mas bilipim?

Edukesen Dipatmen na moa long ol provinsel edukesen opis i mas mekim samting stret olsem ol i putim olgeta TFF mani bilong ol skul i go long akaun bilong ol.

Sapos nogat, planti pikinini i no inap long kisim gutpela save ol i mas kisim long em.

Gavman i tok long givim kwaliti edukesen long ol sumatin na em wok bilong ol gavman opis long lukim wok i kamap stret bihainim polisi bilong Gavman.

Bihainim long kamap bilong TFF polisi, planti ol sut tok tok i go long ol provinsel edministret na edukesen atoriti.

Ol i tok dispela tupela atoriti i wok long holim pasim TFF mani bilong ol skul.

Dispela long wanem Gavman i tok bihainim askim bilong ol skul em i save salim mani i go long ol provinsel edministresen na edukesen opis long tilim i go long wanwan skul.

Kain olsem wok nau i stap long han bilong dispela tupela opis. Sapos tupela i no mekim wok stret, skul na save ol sumatin bai kisim long em bai bagarap na dispela i ken kamapim bagarap long komyuniti na kantri bilong mipela.

Olsem na singaut nau i go bek long Kuman i mas tok stret long hamas mani ol skul i mas yusim long TFF na hamas mani ol DDA i mas makim long ol mani plen bilong ol long skul bilong hap bilong ol i ken aplai, kisim mani na kamapim wok bilong ol.



Published Weekly, Thursday, for Word Publishing Company, Ltd.

P.O. Box 1982, Boroko, NCD  
Papua New Guinea

Telephone: (675) 325 2500

Fax: (675) 325 2579

Email: [editorial@wantok.com.pg](mailto:editorial@wantok.com.pg)

Pe bilong wanpela yia  
52 niuspepa

|                       |             |
|-----------------------|-------------|
| <b>Ples:</b>          | <b>Air:</b> |
| PNG                   | K220.00     |
| AUSTRALIA             | US\$110.00  |
| ASIA PACIFIC na JAPAN | US\$150.00  |
| AMERICA na EUROPE     | US\$210.00  |

**General Manager**  
Elizabeth Konga

**Editor**  
Veronica Hatutasi

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.



# Rot bai helpim gut divelopmen bilong Bogenvil



**KATIM LONG OPIM:** Minista Kaunsila bilong Australia, Rod Hilton, i makim Hai Komisina bilong Australia long PNG, wantaim ABG Vais Presiden Patrick Nisira (hankais), Kieta Distrik Eksekutiv Menesa, Lucy Travertz na Sentral Bogenvil MP na Komyunikesen Minista, Jimmy Miringtoro (Hansut) i katim riben long opim ol rot we ol i apgretim na putim kolta long Arawa.



**WOK PATNA LONG ROT:** Rot wok na mentenens projek long Bogenvil sain long wanpela hap rot namel long Buka na Arawa.



**OL BIKMAN:** Kaunsila Minista bilong Australia, Rod Hilton, ABG Vais Presiden Patrick Nisira, Komyunikesen Minista na Sentral Bogenvil Memba Jimmy Miringtoro na ol arapela bikman bilong Sentral Bogenvil i bung na redi long opim ol rot long Arawa.

## Veronica Hatutasi i raitim

**DISPELA** wik i lukim ol bikman i opim ol rot insait long Arawa Taun, Sentral Bogenvil, na dispela bai gohet long strongim ol wok insait long Bogenvil.

Wantaim gutpela wok bung namel long PNG-Australia Trensport Sekta Sapot Program (TSSP) na Atonomas Bogenvil Gavman (ABG), ol i putim kolta long 8-pela rot insait long Arawa Taun na ol eria klostu. Dispela bai helpim gut tru ol komyuniti i go long ol skul, maket, helpim ol polis lon g mekim gut wok, pablik na ol komyuniti i go long benk na long kisim ol helt sevis.

Ol bai skruim dispela rot projek i go moa abrusim Arawa taun i go long Arawa na Kieta Pot rot. Wok long dispela bai pinis long mun Jun long dispela yia.

Sikpela (6) kontrakta i bin mekim wok long ol wan wan rot long stretim, apgretim na putim kolta em Dekenai, Bougainville Earthworks, Kompaini, lora Roadworks, Central Bougainville Engineering na Eastrac.

Patnasip namel long PNG-Australia Trensport Sekta Sapot Program (TSSP) na Atonomas Bogenvil Gavman (ABG) i bin lukim K11.6 milien rot projek i pinis gut we bai mekim laip na sindaun bilong ol pipel long Sentral Bogenvil, na tu long ol narapela hap bilong rijon i kamap gutpela.

Em bai mekim isi na kamapim gut wokabout na long ol wok divelopmen olsem long sait bilong karim ol samting long salim i go long maket olsem ol gaden kaikai, pis na ol abus bilong solwara, ol kakao, kopra, karim ol samting long wokim ol haus na ol arapela wok na kisim sevis long edukesen na helt tu.

Pait na hevi long Bogenvil i bin bagarapim ol rot infrastraksa na ol arapela samting na wok long stretim ol rot long Bogenvil stat long Buka i kam long Arawa i wok long lukim kirap bilong ol wok divelopmen, kisim ol sevis i go aut long olgeta hap bilong ailan, kirapim na strongim ol wok bisnis na opim dua long Bogenvil i go aut long ol narapela provins long kantri na wol.

Mak bilong ol 8-pela rot we ol i stretim em 25 kilomita. Dispela i kaunim tu 4-pela rot ol i bin stretim na putim kolta long 2012 long Arakawau i go long Arawa.

Rot projek long Arawa i go long Kieta Bris bai konek wantaim wok long stretim na silim Rigu Bris i go long Toimanapu Rot we Nesanel Gavman i wok long em nau.

Rot program long Bogenvil i kam aninit long Australia we i karamapim tu mentenens bilong 400 kilomita rot netwok sistem i kam aninit long PNG-Australia Trensport Sekta Sapot Program (TSSP).

Long seremoni bilong opim ol 8-pela rot i bin kamap long Arawa las wik Fraide Mas 18, Minista Kaunsila bilong Australia, Rod Hilton i makim Hai Komisina i bin tok rot netwok i bikpela samting long rijon i go het na tu, long konektim ol komyuniti na ol bisnis, helpim long strongim gutpela wok kamap. Em i tok Australia i amamas long skruim wok long sapotim divelopmen long Bogenvil.

Em i tok amamas long lukim planti lain i bin kamap long lukim seremoni bilong rot i op long Arawa na tu, ol 7-pela kontrakra i bin wok long ol rot. Mista Hilton i bin tok nupela rot ol i stretim na putim kolta bai helpim long daunim taim bilong wokabout o ran long rot long kar na daunim tu kost bilong fiul long ol praivet bisnis lain, seif long ol manmeri i yusim, ol wait lain na rot sefti sain bai helpim long kamapim gut trefik long taun.

Dispela rot projek bai helpim long konektim gut ol komyunitri i go long ol skul long taun, maket, polis, benk, haus sik na long ol stua.

Mista Hilton i bin tok Kieta Bris i save kisim 160 siping kontena insait long wanpela mun wantaim tu ol konstraksen materiel, ol stua samting na ol samting bilong ol skul na ol haus sik, wantaim tu ol kopra na kakao we Bogenvil i save salim i go ovasis.

Olsem na em i tok, dispela rot projek long Arawa i go long Kieta Bris ol i skruim i go nau na bai pinis long mun Jun bai sapotim na strongim ikonomi bilong Bogenvil.

Trensport netwok sistem long Bogenvil i wok long kamap gut nau, stat wantaim ol bris long Buka i kam long Arawa we gavman bilong Japan i bin wokim na pinisim long 2012, na TSSP i skruim i kam inap nau.

Nau em i save kisim tripela awa tasol long ran long kar namel long Buka na Arawa. Pastaim em i save kisim 4-pela na moa awa, o ol kar na pasindia i save slip long sait bilong rot taim em i ren na ol wara i tait.

Opim Aropa ples balus las yia i lukim moa pipel i go slip long ol geshaus long Arawa na rot i op i go long ol narapela ples balus insait long kantri.

Stretim na silim rot long Arakawau i go olsem long Morgan Jansen i go long Tunuru na Arawa na i no long taim nau, long Arawa i go long Kieta Bris we gavman bilong Australia i fandim bai mekim gut moa rot long ol wok bisnis na ikonomi, moa wok, kamapim gut edukesen, helt na ol arapela sevis mao long rijon.

Ol rot projek i givim wok long planti asples man na meri wantaim na ol asples kontrakta tu.



**WOK LONG ROT:** Ol wok i go het long putim kolta long rot. OL POTO: TSSP Mldia



**TSSP NA ABG:** Wok patna namel long TSSP na ABG i karim gutpela kaikai na ol woklain i amamas na sanap wantaim.



**TAIM BILONG OPIM:** Ol bikman i harim ol toktok long taim bilong opim rot.



**MAKIM AUSTRALIA:** Rod Hilton em Minista Kaunsila bilong Australia i makim AHC na go pas long opim ol Arawa rot na mekim ol toktok.



**ABG VAIS:** Vais Presiden Patrick Nisira i makim ABG na toktok long seremoni bilong opim rot long Arawa.



**BUKA PASIS:** Moto i kisim ol TSSP lain i go long narapela sait bilong Buka Pasis long kisim kar i go long Arawa.







Elisheba, i kisim liklik malolo long hap taim bilong pilai na go painim wara long klinim nek bilong em long namba tu hap taim kemra i kisim em na em mekim Viktori sain bilong Hunters long win. *Poto: Nicky Bernard*

# Bikpela fen bilong Hunters

**Nicky Bernard i raitim**

**WANPELA** liklik fen bilong Hunters i kisim taim long go lukim ol pilai long las wik Sarere nait taim ol i pilai long nupela Nesenel Futbol Stediam.

Dispela liklik meri em Elisheba. Em i gat tripela kris-mas na em save skul long Jack N Jill long 5-Mile long Pot Mosbi.

Olgeta taim em i save lukim kasen brata bilong em, Hendry Wan, i save pilai long TV tasol na em i save sapotim em long haus tasol.

Taim em gat tupela kris-mas, kasen brata bilong em Hendry i save pilai long Kokopo na em i save lukim em long TV.

Taim ol i kam pilai long Mosbi long pinis bilong 2015, em i nogat sans tumas

long go lukim em pilai long Sir John Guise Stediam.

SP PNG Hunters tu i no lusim kasen bilong em Hendry Wan long 2016 Kwinslen Kap resis, tasol ol i bin go pilai tupela gem long Australia na em wetim taim stret bai kasen bilong em i pilai Nesenel Futbol Stediam.

Dispela namba tri gem em ol i bin tok bai Hunters pilai long hom graun. Hariap tru em i tokim mama bilong em long kisim tiket bilong em, tasol ol Stop N Shop i no salim tiket bilong ol pikinini i gat tripela krismas.

Mama bilong em i save olsem na em tokim em olsem long Sarere bai yu ken go na lukim kasen brata bilong yu pilai wantaim ol Hunters.

Elisheba, i amamas tru na

em i wok long kaunim de long kam hariap na em bai go long nupela NFS long lukim ol Hunters na kasen brata bilong em pilai.

Taim Sarere kam, na mama bilong em i tokim em olsem ol bai go long pilai graun long lukim ol Hunters i pilai, olgeta toktok bilong em i pinis.

Elisheba, i sapot singaut long Hunters na kasen bilong em i go inap pilai i pinis. Taim ol Hunters i win, em i pulim han bilong bikpela susa bilong em na mama bilong em long go long sait bilong pilai graun we em ken sekan na holim kasen bilong em Hendry.

Elisheba, nau i putim was gen long wanem taim bai Hunters i pilai long hom graun na em bai go lukim na sapotim gen.

# Bikpela muvi bai kamap long Paradise Cinema Batman vs Superman

DISPELA wiken bai Paradise Cinema long Pot Mosbi wanpela bikpela piksa muvi we planti man-meri na pikinini i wok long putim was long en.

Dispela muvi piksa em Batman i salens wantaim Superman we em i wanpela bikpela muvi i kam aut i no long taim i go pinis.

Batman na Superman bai traim bun bilong tupela bihain tupela kamap poroman gen na bai traim long stopim ol narapela birua husat i laik bagarapim Metropolis.

Paradise Cinema long Sentral Waigani bai soim dispela muvi piksa

long Fraide Mas 25 tumora tasol.

Paradise Cinema tu bai kamap wanpela fan o amams de bilong ol pikinini husat bai go long Cinema na lukim muvi piksa.


Dispela fan de em bilong mekim liklik awenes bilong ol pikinini na bihain bai Paradise Cinema givim sans long ol pikinini long lukim muvi piksa bilong Kung Fu Panda 3.

I gat ol famili pek tu Paradise Cinema i givim long tupela Adalt o ol bik manmeri na tripela pikinini aninit long 12-krismas long K50 tasol na ol pikinini bai winim sampela ol prais i kam long Paradise Cinema.





# Em nau! Ol pikinini i ken painim rot i go long ples wantaim Wantok lain...



Yu pinis! Em ples bilong yu

## STORI BILONG TUMBUNA

### Tupela brata susa i bung

**B**ipo bipo tru, wanpela man i maritime tupela meri bin stap long Pangia long Sauten Hailans Provins.

Nem bilong wanpela em Kewa na narapela em Wiru.

Man em i laik go long wanpela longwe ples na em i tokim tupela meri long stap bek bikos tupela i gat bel.

Bipo em i go, em i tokim tupela meri olsem sapos ol i karim pikinini man, lukautim em. Tasol ol i mas kilim pikinini meri.

Bihain long 4-pela de i go pinis, tupela karim pikinini.

Meri Kewa i karim pikinini man na meri Wiru i karim pikinini meri. Kewapi meri i kirap na tokim Wiru meri long kilim na tromoi pikinini meri i go.

Em i tok pikinini mi karim long en bai brukim paiawut bilong yu na mi na olsem, no ken wari.

Wiru meri i kirap na i tok, nogat! Pikinini meri bai helpim mitupela. Pikinini man bai bikhet.

Tupela i pulim toktok i go i go na larim tupela pikinini i stap.

Nau tupela i kamap bikpela pinis, ol i stap na man bilong tupela i kam bek.

Tupela mama i kirap na tokim tupela pikinini olsem, papa i kam bek nau. Orait tupela pikinini ran i go holim pasim papa ya nogat, papa i pusim pikinini meri na holim pas pikinini man na i go insait long haus bilong meri Kewapi.

Orait pikinini meri wantaim mama i stap ausait na kra i stap. Narapela de, papa i tokim tupela pikinini long go pulumapim wara na em i katim mambu na givim tupela long pulumapim wara.

Mambu bilong pikinini meri, papa i wokim hul long as bilong en na givim em.

Mangki em pulumapim wara hariap na i go bek long haus tasol mambu bilong pikinini meri wara i no pulap hariap, tarangu em i sindaun yet long wara.

Taim em i apim na lukim as bilong mambu em i bruk. Pikinini meri em i go long haus, tasol nogat lain i stap long haus.

Papa i hariapim tupela meri wantaim boi na ol i go pinis. Ol i

go kamap long wara ya ol wok-about antap long rop kon bris i go kamap long hapsait bilong Kagua Erave.

Pikinini meri em i kra i go i go nau em i stat long bihainim lek mak i kam kamap long hapsait bilong wara yalo na singaut i stap.

Mama bilong em i harim na i tok aiyo, gel bilong mi i kam ya.

Na papa i tok long go kisim pikinini meri tasol em i mas pulim em long bilum i kam antap. Papa ya i katim as bilong bilum na taim gel i sindaun, em i pundaun i go long wara na wara i karim em

Long teil bilong wara wanpela man i putim trep long kisim pis na wara i kisim gel i go pas long trep. Papa bilong trep ipulim trep tasol em i hevi tumas.

Em i ting olsem em mas traipela mailo i go insait long trep tasol no gat. Em i lukim wanpela naispela gel na em i kisim em i go long haus na lukautim em i go bikpela.

Wanpela taim long wanpela ples, ol i singsing na mekim moka. Na ol i bilasim liklik man ya na yangpela gel tu, man i bilasim em narakain tru. Em kisim em i go long singsing ples, na em yet i paitim kundu i stap na ol man i resis long taim ol i lukim kala bilong yangpela gel.

Sem taim, gal i lukim wanpela yangpela mangki ol i bilasim em gut tru na ol i kisim em i kam long singsing ples.

Ol i sanapim tupela long lain long paitim Kundu, na tupela i paitim kundu ya i kam stret.

Tupela yet i aigris i go kam na gel i kirapim wanpela singsing olsem; Mi pikinini bilong hia, mi no pikinini bilong man nogat! mi pikinini bilong wara yalo, na mi pis meri i stap o.

Mangki i harim dispela singsing na em i tok, ai ooo, dispela em susa bilong mi stret ya.

Liklik yet em i bin pundaun long wara na wara karim em i go ya.

Yu susa tru bilong mi o, mitupela bai stap wantaim i go inap dai i brukim mitupela.


Amos Apai, Baiyer Zu, WHP



|                      |                  |                 |                 |
|----------------------|------------------|-----------------|-----------------|
| <i>Ol wod lista:</i> | <b>BIHAIN</b>    | <b>INFEKSEN</b> | <b>MOTOBAlK</b> |
|                      | <b>DIDIMAN</b>   | <b>JUNIA</b>    | <b>NILDAUN</b>  |
| <b>ANIVESERI</b>     | <b>DUKDUK</b>    | <b>KAPIAK</b>   | <b>NATING</b>   |
| <b>ALTA</b>          | <b>FRIMERI</b>   | <b>KLIRIM</b>   | <b>OVASIS</b>   |
| <b>ASEMBLI</b>       | <b>GRISMAN</b>   | <b>LAIN</b>     | <b>ONAIM</b>    |
| <b>BIKNAIT</b>       | <b>GUTTAIM</b>   | <b>LEPHAN</b>   | <b>PAPA</b>     |
| <b>BAPTAIS</b>       | <b>HOLIPASIM</b> | <b>MAKET</b>    | <b>PLANTI</b>   |

V O S L N T A A S E M B L I S B S A F P N O S G O  
X H K M W R E G I I Y W I G I A V N N E P Y K U T  
E I A N P W G E R M E Q E K U P L U S A L I O A X  
E T R Z R G C I U R A S E T N T Z O E R A G R F I  
V R Y P H M L M E R S E L E I A T G N B N R L R N  
A E T E L K R L G G N E E A L I I A O A T I E I A  
K B D R I H R T Z G T A A U D S H T I S I S P M R  
O D E R L F O W K H S T T H A U O F C M E M H E O  
N H V H E X K T S V X E A I U M L H Q V I A A R R  
D N T E E X N M O W P S O L N M I A I R J N N I T  
T R Y C A L D E R P S S G V T G P N N F E F O B R  
M G H E Z E Z O O M A K E T A A A E S K Z W D M E  
C D Z D F R S S N S G E E N P S S P N A S L P R K  
V Z E S N I X Q J M H H I P S K I A S P S E R R W  
A S D N Z U J U N I A A A T E T M S A I N O A H E  
S A S L A R W A M N H H C F G I S I E A A S F I K  
S P C G D R L A I I I T N E D U K D U K S Y H Z O  
G E T L R O X A B E K I O I M N I G I E T A E R P  
K R U L T G L I O A O S D P E M A E L C K F M A I  
R S T N S B D E L G E B N H H H S R B Q T N M P R

Ansa bilong Wod Pilai isu 2166







# TOK PISIN NEWS

from Radio Australia  
radioaustralia.net.au

Harim TOK PISIN long  
Radio Australia  
**101.9FM**  
Port Moresby

**Tok Pisin Service**  
6am - 7am 6080; 7240(KHZ)  
7pm - 9pm 5995; 6020; 9710; 1280(KHZ)

## Wes Papua lida i tok tenkyu long sapot bilong Solomon gavman



Fred Mambrasar long lephan.

**Caroline Tiriman i raitim**  
WANPELA lida bilong ol Wes Papua pipel long Papua Niugini i tok tenkyu long ol lida bilong Solomon Ailan long bringim wari bilong ol i go long bikpela miting bilong Human Rights Council long Jiniva, Swiselan.

Fred Mambrasar, em Fri Wes Papua kempen

Kodineta long Papua Niugini i mekim dispela toktok bihain long Ministar Kaunsila na Chargé d'Affaires bilong Solomon Ailan Misin long Yunaitet Nesens, Barrett Salato i bin tokim miting olsem hevi bilong Wes Papua em i bikpela samting na olgeta kantri i mas stretim hariap.

Mista Salato i bin askim tu

Indonesia long wokbung wantaim Human Rights Council long larim wanpela lain bilong Yunaitet Nesens long go lukluk long sidaun bilong ol Wes Papua pipel.

Planti handet tausen pipel i dai pinis long han bilong gavman bilong Indonesia stat yet long taim ol i bin kisim nating Wes Papua moa long 50 yia i go pinis.

## Care Vanuatu i helpim Fiji long saiklon disasta wok



Wanpela famili long Fiji we saiklon i bagarapim haus bilong ol.

**Sam Seke i raitim**

LONG taim we Yunaitet Nesens i tok samting olsem 250 tausen pipel long Fiji i no gat gutpela wara na sanitesen bihain long Cyclone Winston, tupela meri bilong Care Vanuatu i bin go long Fiji long helpim.

Tupela ya em Julia Marango na Winy Marango, tupela susa we i wok olsem monitoring na evaluesen opisa bilong Care Vanuatu.

Winy i tok tupela i go helpim Live and Learn Fiji we i wok wantaim Care International long rot bilong kisim, glasim na skelim ol in-

fomesen long sait long saiklon disasta.

Em i tok ol i bin kisim planti toktok long sait long ol kain kain hevi we pipel i bin bungim, na wok we i go het long helpim ol viktim.

Tupela i bin stat wok taim tupela i kamap long Fiji long Sande i go pinis.

## Insentiv Fan bilong Australia helpim ol yangpela meri



Ol yangpela meri bilong Papua Niugini.

**Caroline Tiriman i raitim**

AUSTRALIA i gat rekot long sapotim ol meri na ol yangpela meri long PNG long bihainim wanem kain rot ol i laikim bilong kamap olsem ol gutpela sitisen.

Wanpela lida meri bilong Papua Niugini i tok tenkyu long gavman bilong Australia long givim ol bikpela sapot long ol meri na yangpela meri long strongim sidaun bilong ol na ol famili bilong ol.

Dispela helpim i stap

aninit long Insentiv Fan programe Australia i bin statim wantaim helpim bilong Hai Komisn bilong Australia long Pot Mosbi long helpim ol meri grup long ranim ol liklik bisnis na tu, ol narapela sevis olsem.

Susil Nelson, em bot memba bilong Insentiv Fan na tu, Presiden bilong Business & Professional Women's Asosiesen bilong PNG i mekim dispela toktok taim, ol i go het wantaim namba foa hap bilong dispela program.

Australia i gat rekot long sapotim ol meri na yangpela meri long PNG long bihainim kain rot ol i laikim bilong kamap olsem ol gutpela sitisen na helpim developmen long kantri.

Susil Nelson i save wok tu long daunim vailens egen-sim ol meri long PNG, i tokim Redio Australia olsem Australia i gat bikpela laik long helpim ol meri bilong PNG long lukautim ol yet gut na ol famili bilong ol long sait bilong mekim ol liklik bisnis long painim mani.

## PNG PM bipo i laikim moa pawa



PNG PM bipo na Nu Ailan Gavana, Sir Julius Chan.

**Caroline Tiriman i raitim**

SIR Julius Chan, Gavana bilong Nu Ailan Provins i sapotim dispela tingting.

Wanpela de ol provins bilong Niugini Ailan long Papua Niugini i mas kisim "greater autonomy" o moa pawa olsem Bogenvil long wanem ol i laik lukautim ol-

geta wok bilong ol yet.

Papa na Praim Minista bipo, Sir Julius Chan, i mekim dispela toktok taim em i bin lonsim nupela buk bilong em long Canberra.

Sir Julius Chan, Gavana bilong Nu Ailan provins i bin raitim dispela buk we i lukluk long laip na stori bilong em yet taim em i yangpela,

na tu wanem samting i bin kirapim laik bilong en long go insait long ol wok politik.

Dispela em i no nupela taim we wanpela lida bilong Nugini Ailan i autim sapot bilong kisim Greater Autonomy, o moa pawa. Ol narapela provins olsem Is Nu Briten na Wes Nu Briten i gat wankain laik na tingting.



# Brussels pilim belhat bilong ISIS

**SAMTING** olsem 31 pipel i dai na 250 i kisim bagarap long Tunde long taim ol teroris i pairapim ol bom long Brussels. Teroris grup ISIS i tok ol i kamapim ol dispela trabel.

Ol dispela bom i pairap long Brussels ples balus na long wanpela andagraun tren stesin klostu long opis bilong European Union. Bikipela bagarap i bin kamap na ol pipel i pret na ranawe nabaut. Bihain long dispela ol i stopim sabwei transpot sistem na tokim ol pipel long

no ken go long ples balus. Ol polis i mekim bikipela wok painim i kamap long Tunde nait long holim wanpela bilong ol dispela lain em ol video kamera long ples balus i bin kisim piksa bilong em.

Ol polis i tok ol i bin reidim wanpela haus long Schaerbeek, ol i bin painim wanpela bom i gat ol nil, ol kemikel prodak na wanpela ISIS plak.

Tupela bom i bin pairap long ples balus na namba tri i no bin pairap. Ol i painim

dispela bom long wanpela sutkes na ol i ting ol arapela bom i mas stap insait tu long ol sutkes.

Ol i bilip olsem tupela bilong ol dispela tripela saspek long ples balus em ol suisaid boma.

ISIS i tok ol soldia bilong en i bin kamapim dispela trabel. Ol i tok ol i bin pairapim ol bom long Brussels bikos dispela kantri i wok wantaim ol arapela kantri long stopim ISIS.

Presiden Obama i givim oda long ol plak bilong Amerika i mas flai long hap mast. Nainpela sitisen bilong Amerika i bin dai long taim ol bom i bin pairap.

### Ol bom i pairap

TUPELA bom i bin pairap insait long ples bilong wetim balus long 8 klok moning. Ripot i tok 10-pela pipel i dai long dispela taim. Namba tri bom i no pairap na ol i painim insait long wanpela sutkes.

Ol tripela Mormon misineri bilong Amerika i bin kisim bikipela bagarap. Wan-

pela misineri bilong Frans ol i bin go lusim long ples balus tu i bin kisim bagarap.


Bihain long wanpela aua, bom i pairap long Maelbeek sabwei stesin. Ripot i tok 21 pipel i dai long dispela taim. Ol ripot i tok namel long 250 pipel i kisim bagarap long taim ol bom i pairap long dispela tupela hap.

Ol dispela bom i bin pairap bihain long ol polis i holimpas Salah Abdeslam, wanpela teroris saspek bilong wankain birua i kamap long Paris, Frans long mun Novemba las yia.

Ol seveilens kamera long ples balus i soim ol tripela man em polis i bilip em ol saspek.

Praim Minista bilong Beljim i tok dispela hevi em i bikipela samting tru long kantri bilong ol.

Ol save lain bilong sekyuriti long ol gavman bilong Amerika, Ingran, Frans na ol arapela kantri long wol i wok long was gut long stopim wankain pasin olsem bilong ol teroris.



Ol windo bilong Brussel ples balus i bagarap.



Tupela meri husat i kisim bagarap long taim ol teroris i pairapim bom.



Tripela saspek husat ol i ting i putim bom long Brussel ples balus.

# Presiden Obama i bungim lida bilong Cuba Raul Castro

Presiden Obama bilong Amerika i mekim namba wan lukluk raun long kantri Cuba we em i bungim Presiden Raul Castro na toktok wantaim em bihain long bikipela welkam seremoni long haus bilong presiden long Havana, biksiti bilong Cuba.

Dispela i namba wan taim long wanpela US presiden i go lukluk raun long Cuba bihain long 88 yia. Calvin Coolidge i bin las presiden bilong USA long go raun long Cuba.

Presiden Obama i bin wokabaut i go long haus bilong Presiden Raul Castro, bihain long em i go putim plawa long matmat bilong Jose Marti husat i wanpela biknem lida long indepen-

dens muvmen bilong Cuba. Long taim em i bungim-Castro, Obama i tokim presiden em i amamas long raun na em na famili bilong em i bin kaikai naispela kaikai long Havana long Sande apinun.

Bihain long dispela Obama na Castro i sanap wantaim na militeri ben bilong Cuba i pilai nesanel entem bilong Cuba na U.S. Bihain ol i wokabaut i go daun namel long ol soldia bilong Cuba na bungim ol arapela deleget husat bai stap wantaim tupela presiden long ol toktok namel long tupela lida. Ol i toktok long ol wok bung namel long tupela kantri.

Long apinun, Obama i tok-tok long ol bisnis inap kamap

namel long Cuba na US.

Sampela bisnis lida bilong US husat i bin go wantaim Presiden Obama i bin stap insait long dispela bung tu.

I bin gat wanpela bikipela kaikai gavman bilong Cuba i bin putim long makim dispela lukluk raun bilong Presiden Obama.

Presiden Obama i bin go long Cuba wantaim meri na tupela pikinini bilong ol na tambu meri bilong em. .

Obama na Castro i bin bung tupela taim bipo. Tupela i bin sekhan namba wan taim long mun Epril las yia long wanpela miting bilong ol lida long Panama na bihain tupela i bin bung gen long taim bilong Yunaitet Nesens Jeneral Asembli long mun Septemba.



Posta i soim piksa bilong Presiden Raul Castro, lephan, na Presiden Barack Obama long tokples Spenis i tok "Welkam long Cuba" autsait long wanpela haus kaikai long Havana, Cuba, Mas 17, 2016.



Presiden Obama na Castro i bung long Cuba.

# Jas redi long mekim save long pailot

Wanpela kot long Rasia i redi nau long tokaut long wanem kain mekim save ol bai givim long pailot bilong Ukraine, Nadezhda Savchenko. Kot i sasim em long stap insait long plen bilong kilim tupela ripota bilong Rasia long Ukraine we woa i wok long kamap nau.

Ol prosekyuta i tok Savchenko i bin wanpela volandia long ami bilong Ukraine long dispela taim, na

em i bin givim oda long paia long gan we i kilim tupela ripota na sampela arapela manmeri long Julai 2014. Ol i tok tu olsem Savchenko i no laikim tru ol lain i stap long Luhansk rijon bilong Ukraine.

Jas husat i harim dispela kot i tok Savchenko i wanpela bilong ol 'kriminal grup' husat i tingting long kilim planti pipel. Ol prosekyuta i askim kot long kalabusim Savchenko inap 23 yia. Bai

kot i tokaut long wanem kain mekim save ol bai givim em long neks wik.

Loya bilong em, Mark Feygin i tok Savchenko bai stop kaikai na stop long dringim wara sapos kot i no larim em i go long Ukraine.

I gat toktok i kamap tu olsem Rasia i tingting long senisim Savchenko wantaim tupela Rasia ol lain Ukraine i bin holim long Is Ukraine. Ol Ukraine i tok ol dispela tupela

em ol soldia tasol Rasia i tok em i no salim ol soldia ol ikwipmen i go long helpim ol rebel.

Pait namel long ol rebel grup em Rasia i sapotim, wantaim ol soldia bilong Ukraine long Is Ukraine i kilim indai moa long 9,100 pipel na i pasim olgeta rot i go long ol arapela hap bilong Ukraine.

Dispela kot bilong Savchenko i kirapim planti tok kros long ol arapela kantri long wol. Ukraine i tok ol rebel lain i bin holim em

long Is Ukraine na givim em i go long han bilong ol Rasia olsem na em i wanpela kalabus bilong woa na i mas kisim spesel helpim.

Savchenko em i wanpela ami pailot, tasol em i pait long Aydar olsem wanpela volandia egens ol rebel na ol i bin holim em long Julai 2014 na bihain em i kamap long Rasia. Tasol Rasia i tok em i bin ranawe long ol rebel na ol i holim em long taim em i laik kalapim boda. Gavman bilong Ukraine i

protest long taim ol Rasia i bin arestim Savchenko, ol i tok em i mas kisim wankain helpim olsem ol arapela kalabus bilong woa na larim em i go fri aninit long wanpela agrimen i kamap nau long Is Ukraine.

European Union wantaim U.S. Presiden Barack Obama i singaut long Rasia i mas larim Savchenko i go fri tasol ol Rasia i tok dispela kot em i samting bilong Rasia na ol arapela kantri i no ken subim nus i go insait long em



# Repsol hariapim Stanley ges projek

**OIL na ges kampani bilong Spain, Repsol, i wok long mekim ol wok long hariapim developmen bilong Stanley Ges kondensat projek long Westen Provins.**

Dispela wok i lukim Repsol i wok long drilim ol eksploresen wel long petroleum prospecting laisens (PPL) 269, kampani yet i tok.

Repsol yet i mekim dispela toktok taim gavman i givim tok lukaut long em i no kirapim ol wok long kamapim dispela ges kondensat projek long Kiunga long Mid Flai Distrik.

Repsol i tok em i pinisim ekspresen ov intres long kamapim ol prokuamen proses bilong Stanley projek.

"Mipela i bin putim pablik tenda na mipela i kisim planti ekspresen ov intres i kam long planti ol biknem

kampani long wel na ges indastri.

"Mipela i nau wok long sekim ol rait kampani husat bai mekim disain na givim mipela ensinia sevis long developim Stanley ges risos.

"Repsol i laik makim wangepela kampani long kamapim fran end ensinia disain (FEED) na givim kontrak long em. Repsol i laik givim tu ol kontrak bilong bilong prokuamen na konstraksen bilong dispela projek tu i go long ol kampani.

"Na mipela i laik givim dispela kontrak i go aut long namba 3 kwata bilong dispela yia," Jesus Chillon, Repsol kantri menesa bilong Australia-PNG, i tok.

Repsol i wok long totkok wantaim Ok Tedi Maining Limited (OTML) long saplaim ges pawa i kam long Stanley ges projek long ranim op-

eresen bilong main.

Mista Chillon i tok planti ol stekholda i wanbel long larim Stanley ges projek i kamap hariap.

"Em bai helpim Ok Tedi long kisim gutpela na klinpela pawa saplai long ranim kopa main ya. I gat ol salens i stap tasol bai mipela i kistatim dispela projek long saplaim pawa long Ok Tedi main," Mista Chillon i tok.

Em i tok Stanley projek bai kamapim moa wok na helpim ol komyuniti na ol papagraun long Westen long kisim gutpela benefit.

Mista Chillon i tok ol kondisen bilong ikonomi i mas stap gut long larim dispela ges projek i kamap gut tru.

Repsol i bin mekim moa driling wok long petroleum prospekting laisens (PPL) 269 (ol Strickland wel) long Westen Provins.

# Kumul Petroleum salim wokman i go long Vietnam

NESENEL oil na ges kampani bilong PNG, Kumul Petroleum Holdings Limited (KPHL), i salim tupela nesenel teknikel wokman i go long kantri Vietnam long wok wantaim JX Nippon long ofso operesen bilong em long hap we tupela man bai kisim speselis skils trening.

Dispela tupela man em Ken Vei husat i ensinia, na Derek Launa husat i petroleum ensinia.

KPHL Jeneral Menesa (Operesens), Wilson Lee, i tok; "Mipela i amamas olsem wantaim bisnis patna bilong mipela, JX Nippon, husat i ekwiti patna tu long PNG LNG Projek, mipela i ken

salim dispela tupela man PNG i go Vietnam long kisim luksave na ekspirens long wol klas intenenenel projek."

Mista Lee i tok Mista Vei na Mista Launa bai wok wantaim ol wok manmeri bilong JX Nippon inap 2-pela mun olgeta long Vietnam.

Em i tok JX Nippon bai trenim tupela long resevio evaluesen, prodaksen menesmen, sevelens, na arapela ol samting wantaim ol nupela komputa samting bilong petroleum indastri.

Antap long dispela, tupela bai lainim ol samting long stopim oil i go aut long solwara. Dispela bai kamap

long ol ofso oil projek na oil fil bilong JX Nippon long Vietnam.

Menesing Dairekta bilong KPHL, Wapu Sonk, i tok, KPHL i laik kamapim sans na moa veliu long larim ol manmeri PNG i kisim moa benefit long sait bilong oil na ges long PNG.

"Wanpela rot bilong kirapim dispela sans em long trening na edukesen long oil na ges indastri. Mipela i amamas long bisnis patna bilong mipela, JX Nippon, i sapatim mipela long trenim tupela man PNG long kisim intenesenel ekspirens na save moa long ofso projek," Mista Sonk i tok.



(L-R) Wapu Sonk, Derek Launa, Ken Vei na Wilson Lee.

# Water PNG opim nupela opis



Sif Eksekutyutiv na Menesing Dairekta bilong Water PNG, Raka Taviri Jnr, i katim ribon long opim nupela opis las wik Fraide.

WARA Kampani bilong PNG, Water PNG, i gat nupela opis.

Ol i lusim pastaim opis bilong ol long Garden City long Boroko, na nau nupela opis bilong ol em long Petromin Haus klostu long Murray Bareks.

Water PNG i rentim dispela opis long Petromin PNG Holdings Ltd, husat i papa bilong dispela haus.

Sif Eksekutyutiv na Menesing Dairekta, Raka Taviri Jnr, i tok Water PNG i opim nupela opis na ol wok man i mas senisim olpela pasin na kamapim nupela gutpela pasin long kisim dispela kampani i go long narapela level.

Wantaim opening bilong dispela nupela opis, Mista Taviri Jnr i tok Water PNG i nau stap gut long givim sevis i go long ol pipel bilong dispela kantri na tu, long mekim winmani na givim i go bek gen long gavman, husat i seaholda bilong en.

"Mipela i bin stap olsem liklik pikinini na mama i bin lukautim mipela. Gavman i kamap olsem papa mama bilong mipela.

"Mipela i nau kamap bikpela pinis na redi long givim i go bek long mama bilong mipela, husat i gavman bilong dispela kantri. Bai mipela i givim moa sevis

long sait bilong gutpela klinwara na suris sevis i go long ol manmeri na bisnis haus long dispela kantri.

"Bai mipela i traim hat na strongim bisnis long mekim moa winmani na givim i go bek gen long gavman," Mista Taviri Jnr i tok.

Water PNG i bin stap long olpela opis bilong ol long Garden City long Boroko long 22 yia olgeta.

Mista Taviri Jnr i tok tenkyu long Menesing Dairekta bilong Petromin, Thomas Abe, long wanbel long Water PNG i muv kam insait long dispela nupela opis.

# Samsung Galaxy S7 kam pinis long PNG



Samsung Galaxy S7 i stap insait long wara tasol bai no inap bagarap.

BIKPELA mobail fon kampani, Samsung, i tok aut long nupela bren bilong mobail fon, Samsung Galaxy S7 na S7 Edge, long PNG maket long Tunde dispela wik long Pot Mosbi.

Ol wok manmeri bilong Samsung Nu Silan Mobail Bisnis na ol wok manmeri bilong Digicel i bin lonsim dispela tupela nupela prodak long PNG maket.

Dispela tupela mobail fon i stail tru. Ol manmeri i ken putim dispela

mobail fon long wara tasol wara bai no inap go insait na bagarapim ol samting bilong mobail.

Bosman bilong Samsung Nu Silan Mobail Bisnis, Stefan Lecchi, i tok dispela tupela nupela S7 mobail pon i gat kain kain nupela samting we ol manmeri husat yusim i ken amamas long painimaut olsem laip em i kamap isi wantaim dispela mobail fon.

Mista Lecchi i tok mobail kamera bilong

dispela fon em i gat moa pawa na i winim arapela ol mobail fon.

"Yu ken go insait long wara na yusim S7 long kisim piksa. Dispela em i nupela prodak na mipela i amamas long lonsim long PNG long wankain taim ol i lonsim dispela nupela mobail fon long Nu Silan, Australia, Ingran, Amerika, na arapela bikpela kantri long Yurop," em i tok.

Digicel i salim dispela mobail fon long olgeta stua bilong em.



# Nupela opis long helpim ol yunit holda



Siaman bilong Securities Commission of PNG, Alex Tongayu, i katim ribon long opim nupela PBF opis long graun flo bilong Defens Haus, Pot Mosbi.

INVESTMEN fan bilong PNG yet, Pacific Balanced Fund (PBF), i wok long gro na opening bilong nupela opis bilong em long Defens Haus long Pot Mosbi i soim olsem dispela fan bilong ol manmeri PNG i stap long han bilong gutpela fan menesa.

Melanesian Trustee Services Limited (MTSL) em i fan menesa na trasti bilong PBF, we ol yunit holda o ol manmeri husat i gat invesmen long dispela fan em ol papa mama na ol lain PNG yet.

Nupela opis bilong PBF em i stap long graun flo bilong Defens Haus long Pot Mosbi na opening bilong dispela nupela opis bai givim sans long ol 20, 000 yunit holda o manmeri husat i inves long dispela fan.

Plantilong ol dispela investa em ol liklik manmeri husat i save wok long kakao plantesen, ol kopra fama na ol arapela man-

meri i kopi fama.

Jeneral Menesa bilong MTSL, Rosa Teria, i tok opening bilong nupela PBF i soim olsem fan i wok long groa na kampani i wok long mekim gut win mani.

"Dispela nupela opis bilong NSL em i namba wan samting bilong yumi olgeta. Dispela nupela opis bai kamap olsem bris namel long mipela na ol 20, 000 yunit holda bilong dispela fan.

"Mipela i bin kamapim plantilong ol nupela samting long groim ol invesmen bilong mipela na disela em i wanpela gutpela samting long we mipela i mekim long helpim ol yunit holdas i kam lukim mipela na kisim moa toktok long olsem wanem invesmen bilong ol i wok long mekim.

"Ol yunit holda i stap long olgeta hap bilong PNG na sampela i stap long ovasis. Plantilong ol Pot Mosbi

na sampela i save stap long arapela ples long PNG na i save kam lukim mipela.

"Dispela nupela opis bai mekim wok i go isi na helpim ol yunit holda i kam lukim mipela na sekim invesmen bilong ol.

"Mipela i wok long mekim isi long helpim ol yunit holda long kam lukim mipela na kolim mipela long telepon.

"Sevis bilong mipela bai kirap na mipela i laik putim ol yunit holda i go pas long olgeta samting mipela i mekim," Misis Teria i tok.

Em i tok PBF i nau singautim ol manmeri husat i bin invest long Investment Corporation Fund of PNG (ICFPNG) long kam long opis bilong PBF na sekim hamas yunit ol i gat long hap.

Dispela em i wanpela gutpela samting ol i mekim long kirapim gen ol invesmen bilong ol papa mama na ol liklik manmeri husat i bin baim sampela sea long ICFPNG.

# Gavman mas luksave long papagraun

GAVMAN mas sapotim ol papagraun long kirapim ol liklik bisnis long wanem hap ples ol asples manmeri i skelim olsem sans bilong mekim bisnis i stap.

Deputi Oposisen Lida Sam Basil i mekim dispela toktok long Palamen long Trinde taim em i harim olsem gavman i no luksave long ol papagraun long Lae, Morobe

Provins taim ol i larim wanpela ovasis kampani i kisim kontrak long stevedoring sevis long Lae Sip bris.

"Tupela kampani bilong ol papagraun i bin resis tu long kisim kontrak. Tasol gavman i les long larim ol i kisim dispela kontrak.

"Gavman i larim wanpela ovasis kampani i kisim dispela kontrak.

"Gavman i wok long toktok long kirapim SME bisnis tasol em i no helpim ol manmeri long mekim bisnis," Mista Basil i tok.

Em i tok ol papagraun long Lae i no ken stap natting na lukluk long ol ausait man i kam mekim bisnis long graun bilong na ranawe wantaim mani ol i mekim long hap.

# Wok kamap bilong PBF em i gutpela tru

INVESTMEN fan bilong PNG yet, Pacific Balanced Fund (PBF), i wok long mekim gut moa mani taim plantilong ol kampani na bisnis haus long PNG na arapela kantri i wok long bungim bikpela salens long bisnis envairomen.

Sampela bilong dispela ol salens i kam long pundaun bilong ol komoditi prais na pundaun bilong oil na ges prais long intanesenel maket.

Ekesekeyutiv Siaman bilong PBF, Robert Igara, i tok wok kamap bilong PBF em i gutpela tru bikos olgeta yia, em i wokim win mani na peim ol manmeri husat i inves long em.

Mista Igara i mekim dispela toktok long Desemba 2015 isu bilong MTSL niusleta.

Em i tok long fainensal yia 2006, net veliu bilong PBF em i sanap olsem K56 milien. Tasol dispela mani mak

i wok long gro na long fainensal yia 2013 na 2014, veliu bilong PBF i gro i go antap long K61 milien.

"Dispela gutpela risal bilong gro long ol invesmen bilong PBF long 7-pela yia em i gutpela tru. Yumi ken mekim gutpela plen long larim PBF i invest gut na mekim moa winmani," Mista Igara i tok.

Mista Igara i tok long las yia, bod bilong PBF i bin mekim wanpela stratijik rivi long redim dispela fan i apim wok kamap long narapela 5-pela yia moa.

"Ol oditet fainensal stemen bilong yia 2014 i redi pinis. Bilong fainensal yia 2015, em bai redi long mun April 2016. I luk olsem ol investa bai kisim win mani o dividen bilong ol," Mista Igara i tok.

Mista Igara i tok trasti na fan menesa bilong Melane-

sian Trustee Services Limited (MTSL) i lukautim ol invesmen bilong PBF.

"Mipela i luksave olsem ol kampani we PBF i gat sea long en i wok long mekim gut winmani na dispela em i gutpela sain," Mista Igara i tok.

PBF i gat sea long ol dispela kampani bilong PNG yet: Amalpack Limited (30 pesen), Associated Mills Limited (26 pesen), BOC Gases (PNG) Limited (26 pesen), Kumul Hotels (26.9 pesen), Markham Culverts Limited (25 pesen), Metal Refining Holdings Limited (100 pesen), Niu Marsh (30.8 pesen), Origin Energy (PNG) Limited (33 pesen), SP Holdings Limited (0.1 pesen), JKL Properties Limited (20 pesen), Toyota Tshusho (PNG) Limited (24.1 pesen), Trukai Industries Limited (33.8 pesen), na PBF Properties (100 pesen).

# Steamships salim hotel long Madang

LONG taim kampani bilong PNG, Steamships Trading Company Limited, i laik salim wanpela bikpela hotel bilong ol long Madang.

Nem bilong dispela hotel em Coastwatchers Hotel na em i wanpela biknem hotel long Madang we plantilong bikpela bung i save kamap long en.

Ol turis na manmeri long Madang yet i save bisi tu long dispela risot long Madang, tasol Steamships i laik salim dispela hotel na em i putim toksave pinis long niuspepa.

Taim plantilong Steamships i bin putim toksave long niuspepa long salim dispela hotel, sampela manmeri i bin tingting plantilong.

Steamships Jeneral Menesa bilong Koporet Afes, David Toua, i tok plen bilong salim

hotel ya i bin kamap taim kampani i bin lukluk long bisnis strateji bilong em na mani em i gat long mekim bisnis.

Mista Toua i tok Steamships i gat plantilong bikpela hotel long PNG na dispela i no namba wan taim ol i salim hotel.

"Kampani i gat bikpela ol hotel i stap long PNG, na tu dispela em i no namba wan taim mipela i salim hotel. Steamships i bin salim pinis Smugglers Inn long Madang na Lamington Hotel long Popondetta pastaim," Mista Toua i tok.

Em i tok kampani i bin salim dispela tupela hotel na Coastwatchers Hotel bikos ol i no bin bungim bisnis strateji bilong Steamships.

"Mipela i bin salim Datec long Telikom PNG. Wankain olsem ol dispela hotel, mipela

i salim Datec pinis bikos ol i no stap wantaim bisnis strateji bilong mipela," Mista Toua i tok.

Em i tok plantilong kampani i salim pas i kam long baim dispela hotel, tasol Steamships i no mekim disesen yet long salim long husat.

Mista Toua i tok Steamships i investim moa long K1 bilien long PNG insait long 5-pela yia long kirapim ol bikpela haus long Madang na Pot Mosbi, kirapim ol bikpela stua long Lae na Pot Mosbi, kirapim ol haus bilong slip long Lae na Pot Mosbi, apgretim ol hotel long Pot Mosbi, na baim nupela sip long strongim siping bisnis bilong em long PNG.

Mista Toua i tok Steamships bai no inap lusim PNG bikos em i wanpela biknem na olpela kampani bilong PNG.

# Water PNG bai kamap kampani

WATER PNG bai kamap olsem ol arapela stet on entaprais, Siaman bilong bod, Bill Sweet, i tok.

Mista Sweet i tok Water PNG i nau kamap bikpela pinis na em bai no moa lukluk long mama bilong em, husat i gavman bilong PNG.

Tasol em bai sanap strong na mekim mani long sapotim ol opresen bilong em, na tu mekim winmani na givim

i go bek gen long gavman.

Mista Sweet i mekim dispela toktok las wik Fraide taim ol i opim nupela opis bilong Water PNG long Petromin Haus long Pot Mosbi.

Mista Sweet i tokaut tu long nupela Kod ov Kondakt o lo bilong wok ples long Water PNG, we em i laikim olgeta wok manmeri long biahainim.

"Dispela nupela lo bai helpim kampani bilong yumi i gro na kamap wanpela bikpela wara kampani long PNG.

"Mi laikim olgeta wok manmeri i mas biahainim," Mista Sweet i tok.

Dispela lo i tok long integriti, timwok, gutpela kastoma sevis, lidasip, trensparensi na pasin kalsablong Water PNG.



# Ol pipel long Japaraka gat nupela wara saplai na klasrum

**WARA na gutpela klasrum i bikpela samting long laip, wokabaut na sindaun bilong ol skul pikinini.**

Olsem na long las wik, ol pipel na skul pikinini bilong Japaraka long Yangoru – Sausia Distrik long Is Sepik i bin gat as long selebret taim ol i opim wara saplai projek na nupela klasrum bihain long 40 krismas.

Japaraka 1 na 3 viles long Sausio Lokol Level gavman i bin stap insait long sere- moni bilong opim nupela el- ementerer klasrum na namba wan wara saplai projek tru long eria we Palamen memba bilong ol na Tred na Komes Minista, Richard Maru i opim.

Insait long 40 krismas, dispela tupela ples long Sepik Haiwe i no lukim wan- pela gutpela wok kamap long sait bilong gutpela wara saplai na tu, no gat wari long kamapim gut edukesen standet i kam long pastaim lida.

Wantaim gutpela wara saplai na ol nupela klasrum, ol papamama bai no inap

gat planti wari bikos ol liklik elementeri skul pikinini bai no nap kirap long bik mon- ing tru long wokabaut i go long skul i stap longwe. Dis- pela em bikos skul i stap klostu na ol pikinini i seif.

Ol i wokim dispela wara saplai long manimak inap long K450, 000.00 we Ne- senel Gavman i patna wan- taim Water Aid PNG i fandim taim Yangoru-Saus- sia Distrik Developmen Atoriti i fandim dispela ele- menterer klasrum.

Long opim tupela projek, Mista Maru i bin tok ol pipel i bnin karim hevi na i no lukim gutpela developmen bikos ol pastaim lida i no bin tingim long kamapim ol gutpela wok developmen o kisim sevis i go long ol ples. O, ol lida pipel i makim i no gutpela.

Em i tokim ol pipel olsem em i bikpela samting long gat gutpela wara we ol i ken kisim isina yusim na tu, em i bikpela samting long putim mani na risos long bihain taim bilong ol pikinini bilong ol .Em i bin askim ol pipel

long lukautim gut tupela projek na tok teknyu tu long ol long helpim long sanapim na pinisim ol projek ya.

Twelpela (12) viles insait long 26 wod long olgeta hap bilong Ynagoru-Sausia Dis- trik nau i kisim gutpela wara saplai, na ol bai bildim sam- pela moa yet.

Mista Maru i tok long taim em i stap long Palamen, bai pipel i lukim senis wantaim ol nupela klasrum long 4- pela Lokol Level Gavman eria.

Is Sepik Provinsel Minista bilong Edukesen, na Presi- den bilong Is Yangoru LLG, Jeffrey Wafi, i makim ol pipel bilong Japaraka na tok tenkyu long Minista Maru long kisim moa sevis i go long ol pipel, moa yet long edukesen, helt, egrikalsa, pawa na wara saplai we i sapotim ol bisnis, laip na sin- daun bilong pipel.

Em i tok i moabeta long ol elementeri skul tisa long kisim gutpela trening long skulim gut ol pikinini long rit na rait bipo ol i go long pr- saimeri skul.



Ol elementeri skul pikinini bilong Urimo.



Minista Richard Maru i toktok wantaim ol pipel long seremoni bilong brukim graun long wokim rot projek.

## Usino pipel glasim Wol Visin projek wantaim bel-hevi

OL PIPEL bilong Usino lokel level gavman (LLG) long Madang i mekim strongpela askim i go long ol bikpela in- vesta na ol gavman na non- gavman long wok-bung long karimaut ol plen bilong ne- senel gavman long bringim ol sevis i go long ol pipel.

Ol pipel bilong Usino viles long Wod 31 bilong Usino LLG i bin wokim dispela tok- tok bihain long kamap bi- long wanpela demonstrasen plot long sait bilong komyu- niti i abrusim birua na ol projek long helpim ol pipel i kamapim gut laip na sin- daun, i bin kamap long Boko viles long Wod 31 bilong Usino LLG.

Wanpela papagraun na komyuniti lida, Gerhardus Borkent i tok ol pipel bilong Usino i gat wari olsem Ramu NiCo Project, Walium distrik

egrikalsa opis na NGO olsem World Vision i no wok bung long sevim komyuniti ol i stap insait long en.

Borkent i mekim dispela toktok bikos long sik nogut bilong kakao em Kakao Pod Bora badwud projek we World Vision i karimaut long Boko viles i no wok wantaim long taim luksave bilong ol asples pipel.

Em i tok Ramu NiCo (MCC) i go het long kakao develop- men long projek eria bilong en wantaim helpim na sapot bilong PNG Kakao Kokonas Institiut (PNGCCIL). Tasol World Vision i wok long kari- maut wok bilong en yet na nogat wok patnasip o wok- bung.

“Sapos Usino em komyu- niti ol dispela developmen ejensi i laik helpim, orait ol- geta i mas wok bung na

serim risoses na serim ting- ting wantaim na bringim helpim i go long dispela komyuniti,” Borkent i tok.

Em i tok olsem wanem kain developmen projek ol ovasis gavman givim mani long kamapim o projek bi- long PNG gavman.

NGO o kampani em ol i mas wok bung wantaim wanem lain ejensi long graun na dispela bai helpim long serim risos na serim tingting long givim gutpela helpim i go long komyuniti.

“Wanem samting mipela lukim nau em World Vision na ol arapela NGO i kisim bikpela mani tru long ol ova- sis gavman long kamapim ol projek long ol rurel ple, tasol ol dispela projek i no save stap longpela taim long sevim ol pipel,” Borkent i tok.

“Mipela laikim olsem

wanem NGO ol lain i kam long ples bilong mipela i mas wok bung wantaim long helpim mipela,” Em i tok.

Ol Usino pipel i no ama- mas tumas bikos World Vi- sion i go insait long ples bilong nogat toksave long wod 31 kaunsila na abrusim Usino viles we i gat bikpela namba manmeri na projek i sapos long stap long hap.

“Kain pasin World Vision i wokim long go insait long bik-bus bilong Boko i soim olsem ol i laik stil tasol na i no tingim ol pipel. World Vi- sion i noken kam tasol long ples bilong mipela na kalapim banis na kamapim ol projek long tumbuna graun blong mipela na no kisim tokorait long mipela,” Borkent i tok.

Ol pipel long Usino i tok lukaut i go long Gavman bi- long Australia husat i givim mani long projek long Boko viles olsem ol i mas lukaut gut. Dispela em bikos planti ol World Vision projek insait long las 5-pela yia i go bagarap bikos dispela NGO i no save wok bung wantaim ol gavman lain na ol arapela developmen patna.

“Mipela askim strong tru olsem World Vision i mas go bek na lukluk gen long ol projek long bihain na wokim samting stret na noken gridi tumas long mani,” Borkent i tok.

## I nogat ren yet long Westen na Milen Be

**Caroline Tiriman i raitim**

PLANTI pipel long Westen na Milen Be Provins nau i wok long kisim sik bun nat- ing bihanim bikpela drought o bikpela em i go hed iet long kantri.

Sally Lloyd, wanpela meri bilong Australia husat i bin stap long Westen Provins i dispela drought o taim bi- long bikpela san we El Nino i bin statim long 2015 i kamapim planti hevi yet long PNG, maski ren i wok long pudaun long planti wik nau.

Opis bilong National Weather Sevis i bin tokaut long mun i go pinis olsem dispela drought nau i pinis, tasol La Nina, susa bilong El

Nino nau bai kamapim planti ren na ol taim nogut.

Ol mansave bilong Egrikalsa, olsem Dokta Mike Burke bilong Australian Na- tional University long Can- berra i tok bikpela sot long wara na kaikai i go hed yet long Westen na Milen be provins..

Sally Lloyd, husat i bin kamap bikpela long Westen Provins na tu, em i save helpim ol pipel bilong dis- pela hap i wanbel long dis- pela.

Em i tok planti pipel long provins i nidim helpim yet long sait long kaikai long wanem, ol gaden bilong ol i no gat gutpela kaikai bikos biksan i kukim.

## Bogenvil bai kamapim kopi na welpam

Ol pipel bilong Bogenvil nau i wok long lukluk long statim tupela nupela egrikalsa krop bilong helpim ol fama i groim wantaim kakao na kokonas.

Seketeri bilong Dipatmen ov Praimeri Industris wan- taim ABG em Thomas Beti- tis, i tokaut long dispela taim olsem World Vision i mas go bek na lukluk gen long ol projek long bihain na wokim samting stret na noken gridi tumas long mani,” Borkent i tok.

Bai ol i lonsim dispela pro- jek long dispela wik.

As tingting bilong displa wokbung em long helpim ol pipel i yusim sampela mani bilong luksave na strongim egrikalsa, trening na ol wok painimaut oa risets long Bo- genvil.

Tasol gavman nau i lukluk long statim ol kain kes krop olsem kopi na welpam.

Mista Betitis, em i tok ABG nau i wok long lukluk strong long developim ol dis- pela nupela kes krop.



Sain bot bilong projek long Boko mausrot long Usino LLG wod 31



# Manly i win namba wan taim long NRL sisen



**MANLY** Sea Eagles i win namba wan taim long Nesenel Ragbi Lig (NRL) sisen bilong dispela yia.

Ol i bin daunim Cronulla Sharks, 22-12 long Brookvale Oval aninit long kosa Trent Barrett.

Sea Eagles i daunim ol Sharks long Monde nait long ai bilong 5, 122 manmeri na pikinini long raun namba tri.

Fowod bilong ol Manly, Martin Taupau, i bin lusim pilai graun long 33 minit bihain long em i bin mekim hai takol long Jack Bird bilong ol Sharks, tasol ol Manly i pilai

strong na winim ol Sharks. Jack i lusim pilai graun long dispela taim bikos em i bin pundaun nogut long dispela taim.

Ol Sharks i pilai gut na ol i bin stap pas long namba wan hap wantaim 8-6.

Tasol, long 48 minit, Brett Stewart i putim namba 87 traum bilong em long namba 95 gem long NRL resis. Dispela i bringim skoa bilong Manly i kamap antap na ol i go pas, 12-8.

Sea Eagles i skruim skoa bilong ol moa yet, 18-8, taim Jack i putim wanpela trai

gen long klostu taim.

Long 65 minit bilong resis, winga bilong ol Sharks, Valentine Holmes, i painim wanpela rot long skruim skoa bilong ol Sharks i kam antap klostu long ol Manly, tasol kik bilong ol i no go insait, 18-12.

Tasol, pilaia bilong ol Sharks, Tom Trbojevic, i pasim trai bilong ol Manly long 73 minit na i no gat wanpela sans bilong ol Sharks i stap long resis moa.

Manly daunim Sharks, 22-12, long asples bilong ol

# Cowboys, Eels na Titans i win

RAUN namba tri bilong 2016 NRL sisen i soim olsem Cowboys, Eels na Titans i putim planti trai long amamasim ol yet, tasol ol narapela tim i painim hat liklik long winim birua tim bilong ol.

Stail pilaia bilong Eels,

Semi Radradra, i soim kala bilong em stret we ol i bin daunim ol Bulldogs, 20-6, tasol ol Roosters i guria long stat bilong resis we ol i no kisim wanpela skoa na ol sempion birua, Cowboys, i daunim ol, 40-0 poin.

Knights na Raiders i kisim wankain poin, 24-24, tasol ol Panthers i bilasim ol yet wantaim wanpela poin na rausim ol Broncos, 23-22. Na Dragons i rausim tupela ai bilong Rabbitohs wantaim tupela poin, 8-6.

Wanpela gem i stap yet em ol Manly i pilai egensim Cronulla, we Manly i lukluk i go daun long ol Cronulla wantaim 22-12.

# Heviweit Sempion Browne i feilim test



NAMBA Wan heviweit boksen sempion bilong Australia, Lucas Browne, i feilim test long wanpela marasin we ol i bin stopim pinis na em laikim lo i mas stretim dispela hevi bilong em.

Browne i tok long lo i ken stretim hevi bilong em bihain long test ripot bilong

Las Vegas ejensi Volunteri Enti-Doping Asosiesen (VADA) i tok olsem em i kisim dispela marasin, bipo long em bai pait wantaim boksa bilong Rasia, Ruslan Chagaev, long Chechnya.

Namba wan test i tok em i kisim dispela marasin tasol em i no go long

namba tu test bikos VADA i laikim Browne long baim namba tu test.

Presiden bilong VADA, Dokta Margaret Goodman, i tok, "Browne i mas yusim mani bilong em yet long go long namba tu test bikos namba tu test em i bikpela test."

# Australia i rausim Bangladesh long Wol T20

KRIKET pilaia bilong Australia, Usman Khawaja na Adam Zampa, i kisim tripela wicket na i kamap wina long Wol Twenti20 pait wantaim Bangladesh.

Khawaja i soim narapela kain stail bilong em na i mesarim nok long 58 na paitim bal long Bengaluru.

Bihain em i bin daunim Nu Silan long Dharamsala na dispela em i wanpela sain i strong ol man husat i save makim long pikim em long open pas long Aaron Finch.



# Alonso i bam long Australian Gren Pri



LAIP bilong Fernando Alonso i putim long bikpela kar resis i kamap taim ol i opim sisen bilong Australian Gren Pri long las Sande, tasol em i strongim em yet.

Alonso i tok em i ranawe long kar i bam na nau mama bilong em bai lukim em i stap seif.

"Mi seif bikos mi save gut long ol seifti rul bilong Fomula Wan na mi tok tenkyu long

dispela. Nau mi stap laip na mi tok tenkyu long mi save mekim wok bilong Fomula Wan insait long 10 inap 15 yia," Alonso i tok.

Sampela lain i tok olsem Alonso i no inap long stap laip, tasol em i stap laip. Ol pipel i gat bikpela askim olsem seifti plen bilong Fomula Wan i mas mekim wanpela spesel sia bilong was long laip bilong ol draiva taim ol i bungim birua long taim bilong resis.





# GLASIM RAMU NiCo PROJEK



*Wanpela Ramu NiCo, Wanpela Komuniti*

# Ramu NiCo go het long sapotim edukesen long projek eria

**RAMU NiCo Menesmen (MCC) Limited i bin helpim wantaim moa long K600, 000 olsem skul fi subsidi bilong ol sumatin long foapela lenona eria insait long Ramu Projek long Madang provins taim dispela program i stat.**

Ramu NiCo gavman rilesen opisa, Ivan Mullul i tokaut long dispela long 2016 Fes Kwata Riviu miting bilong Rivais memorandum ov agrimen (MoA) we i bin kamap long Jais Aben Risot Hotel Mas 9 i go 11 long dispela yia.

Mista Mullul tok maski prais bilong nikel long wol maket i pundaun Ramu NiCo i bihanim yet MoA na sapotim edukesen bilong ol pikinini insait long Ramu projek eria.

“Skul fi subsidi program i stat long 2008 na ikam inap nau wei i lukim kampani i yusim K155, 000 long helpim 48 pela sumatin olgeta bilong Kurumbukari papagraun asosen long kisim save long kainkain skul insait long provins na kantri,”

“Basamuk, Kostal Pipeline, na Inland Pipeline i kisim moni mak olsem K150, 000 long na helpim ol pikinini bilong ol long skul fi,” Mista Mullul tok.

Em tok Basamuk nau i gat mak olsem 48 sumatin kampani helpim pinis, Kostal pipeline 66-pela na Inland Paiplain em 86-pela sumatin kisim halvim bilong kampani since 2008 long go long lo yunivesiti, ol kolis na ol narapela skul insait long kantri.

Mista Mullul tok las yia, 2015

kampani putim K50, 000 igo long edukesen bilong ol sumatin bilong foa pela papagraun asosiesen, we i lukim Krumbukari kisim bikpela mak mani bihanim MOA.

Em tok wankain long dispela yia kampani i putim narapla K50, 000 olsem edukesen sabidi long sapotim tu gavman polisi bilong fri edukesen.

“Dispela yia bai lukim Krumbukari kisim K17, 000 na ol narapla asosen kisim K11, 000 each wei kampani bai baim skul fi bilong ol sumatin bilong ol husait ol komiti bilong ol selectim long kisim,” em tok.

Mista Mullul tok dispela em komitment bilong kampani insait long MOA long helpim ol pikinini kisim gutpela save long kamapim gutplea developmen insait long ples, projek na kantri bilong ol wankain taim tu bai helpim ol long go kam bek na wok long Ramu Nickel projek.

Em tok Ramu NiCo las yia sapotim 10-pela sumatin bilong Kurumbukari, 3-pela bilong Basamuk, 6-pela bilong Kostal na 7-pela bilong Inland pipeline nau i stap long kainkain skul insait long kantri.

Em tok dispela yia long namba wan mun i kam inap nau kampani wok long peim ol skul fi bilong ol sumatin wei komiti salim i go long skul akaun bilong ol.

Mista Mullul askim ol papa graun long sapotim kampani na putim eduksen olsem namba wan samting long long gutpela sindaun bihain.




Ol sumatin long Tugyak klostu long Basamuk i waswas na redi long go long skul.



Ol skul pikinini amamas long presen Ramu NiCo i givim.



Ol sumatin long Enekuwai praimeru skul long Kurumbukari eria long Usino-Bundi.



KBK Mining

135 KM Slurry Pipeline

BSK Refinery



# Cosby i winim gol

...redi long Westen sait Ipatas kap



McCoy Yallon bilong Cosby i redi long pasim bal i go long poro pilaia bilong em na wanpela trai i bin kamap taim em I pasim I go long em. Dispela trai i bin gat moa pawa we ol i winim gol.

## Ale Asa i raitim

**COSBY Bumpers i bin winim gol long Ragbi Lig resis long Enga sait long las wiken na i redi long resis long Westen sait bilong Ipatas Kap resis bai kamap long dispela wiken long Wabag, Enga provins.**

Bumpers i kisim gol medal bihain long ol i daunim 3-pela tim long Johnson Siki Oval long Aipus, Wabag.

Bumpers i pilai egensim ol Dep Eels long namba wan gem i bin kamap long las wik Fraide we ol i daunim ol Eels, 14 -11.

Namba tu gem i bin kamap long Sarere we pilai i bin kamap namel long ol Bumpers na premia bilong Wabag Lig, Sangu Nights.

Banis bilong tupela tim wantaim i strong tumas, tasol ol Cosby i kisim hatpela trening

wantaim bipo pilaia bilong Miok na Kumul, Leo Kongai, na ol i strong moa we ol i slekim strong bilong ol Nights na daunim ol, 14 -4.

Namba tri gem i kamap long Sande we Cosby i win gen. Cosby i daunim strongpela tim, Eastern Spiders, wantaim 14-11.

Ol i winim gol medal na nau ol bai resis long Western sait long Coca Cola Ipatas kap resis.

Ol wina bilong Western sait long Ipatas Kap resis bai pilai long Fraide, Sarare na Sande long Johnson Siki Oval long Wabag.

Papa bilong Coca Cola Ipatas kap na gavana bilong Enga provins, Sir Peter Ipatas, bai opim dispela gem long Fraide.

Ol Westen sait tim husat i winim gol medal long resis long Wabag em Hela, Mendi, Wabag, Hagen, Jiwika na Simbu.

## Hunters skwat i redi long raun namba 4 i kam long bek pes

SP Hunters i daunim ol Tweed Head Seagulls wantaim tupela poin long namba tri raun bilong Intras Supa Kap resis long las wik Sarere.

Pilai i kamap long asples bilong Hunters, Nesanel Futbol Stediam, long Pot Mosbi we skoa i sanap olsem 20-18.

Hunters i win long namba wan raun inap namba tri raun na dispela win i kamap bikos, ko-kepten bilong Hunters, Noel Zeming, i kikim wanpela kik i go insait.

Zeming i kisim dispela tupela poin long stat bilong pilai na ol Hunters i stap pas wantaim tupela poin.

Ol Seagulls i hariap tru bekim dispela poin we pilaia bilong ol, James Wood, i brukim malomalo banis bilong Hunters na putim namba wan trai bilong Tweed we ol i stap pas, 4-2, bikos kik bilong ol i no go insait.

Ol Hunters i senisim stail bilong ol we huka bilong ol, Wartovo Puara Junior, i lukim Watson Boas i senisim fait-eit, Ase Boas, husat i bikpela brada bilong Watson, i kisim bagarap long lek. Wartovo i putim namba wan trai bilong ol Hunters long namba 25 minit na we Zeming i isi tru putim kik i go insait, 8-4, na ol i stap pas gen.

Puara i soim stail bilong em ples klia we em i pasim bal i go long Adex Wera na Wera i pasim i go long Edward Goma, na Goma i putim namba tu trai bilong ol Hunters bihain long 5-pela minit bilong namba wan trai i bin kamap.

Namba tri konvesen kik bilong Zeming

long dispela nait resis em i no gat wanpela asua i bin kamap long skruim poin bilong ol i go antap long 14-4, long 10 minit i stap yet long bungim taim bilong malolo.

Tasol, ol Seagulls i putim namba tu trai wantaim stail kik bilong ol insait long 10 minit i stap yet long bungim malolo taim i skruim poin bilong ol i kamap klostu long ol Hunters, 14-10.

Resis long namba tu hap i kamap strong liklik, tasol ol Hunters i asua long namba 6 minit na Seagulls i kisim wanpela penelti kik na bringim skoa bilong ol i kam antap long 14-12.

Long 17 minit bilong namba tu hap bilong pilai, pul-bek bilong ol Seagulls, Shannon Walker, i trikik gut birua bilong em, Amean, na daunim tingting bilong ol Hunters wantaim trai na kik, na ol i stap pas 18-14.

Seagulls i mekim ol Hunters i stap long bikpela presa long asples bilong ol tasol, Wabo i bin mekim wankain trik, olsem pul-bek bilong ol Seagulls i mekim, long 30 minit bilong pilai na pasim wantaim laspela trai bilong ol Hunters. Zeming i isi tasol putim kik i go insait long kamap wina wantaim tupela poin, 20-18.

Hunters i stap namba tu long lada na Seagulls i stap namba 11. Townsville Blackawks i stap namba wan bikos Blackhawks i daunim ol South Logan Magpies wantaim bikpela poin, 46-26, long namba tri raun.

# Barramundis i helpim GDCU program



Ol piksa i soim ol pilaia bilong HEBOU PNG Barramundis i sapatim Grin De Klin Ap (GDCU) program long Poreporena Viles. Ol Piksa: Cricket PNG

HBOU PNG Barramundis i kisim taim bilong ol long trening na putim hanmak bilong ol na i sapatim Poreporena Viles Grin De Klin Ap (GDCU) program long Sarere, 16 Mas.

Gud Nius Ministri bilong Pikinini (GNM) i sponsa long GDCU program long rausim ol pipia long Poreporena viles long mekim wok redi long longpela lsta wiken na lukim Intenesenel Et De long Epril 22.

Asisten Kosa bilong PNG Barramundis, John Ovia, i stap wantaim ol bai long taim bilong klinim ol pipia na i tok olsem, "Dispela em i wanpela rot bilong tim i save givim sapat i go bek long komyuniti bikos planti pilaia bilong mipela i bilong Poreporena komyuniti.

"Na tu em i sosel wok bilong mipela long promotim envairomen tok save long stap long wanpela klinpela hap insait long komyuniti."

GDCU i bin stat long 9.00 kilok moning we ol pilaia bilong PNG Barramundis i go pas na rausim ol pipia wantaim helpim bilong NCDC Weist Menesmen.

Barramundis i go bek long ful trening long Manden na i mekim wok redi bilong Intenesenel Kriket Kaunsil (ICC) Wol Kriket Lig Sempionsip (WCLC). Resis bai kamap namel long Barramundis na Kenya long Me 2016, long Amini Park, Pot Mosbi.

## Meri PNG bai opim resis wantaim Brasil

OL meri pilaia bilong Papua Niugini, husat bai go pas long FIFA anda-20 Wol Kap resis bilong ol meri bai pilai egensim ol meri bilong Brasil long taim ol bai opim pilai long 13 Novemba long Pot Mosbi.

Opisal dro bilong resis bai kamap insait long 3-pela wik em ol i holim yet long FIFA hetkwata long Zurich na nupela presiden bilong FIFA, Gianni Infantino, i tok ol wok redi bilong FIFA resis i kamap orait stret.

"Mi bin go Papua Niugini long Pot Mosbi na dispela em i bikpela ekspirians we weta bilong mosbi em i gutpela stret, tasol wanpela bikpela samting moa em PNG bai welkamim wol na wol bai go lukim PNG," In-

fantino i tok.

"PNG bai soim mipela long wanem rot ol bai go pas long dispela resis na ol bai soim ogeta kala bilong ol long Pot Mosbi.

"Olgeta wok redi long go pas long dispela resis bai pinis klostu taim, tasol i gat liklik wok long pinisim bipo long gem bai stat.

Long opim dispela resis, Papua Niugini bai salensim Brasil long Pul A na Sweden bai salensim Saut Korea.

Ol kantri bai salens long Pul B em Spain bai pilai wantaim Canada na Siapan bai pilai egensim Nigeria.

Nu Silan bai resis long Pul C egensim Frans na USA ba resis wantaim Ghana, na long Pul D em Gemeni bai

pilai egensim Venezuela na Mexico bai salensim North Korea.

"Mi tok tenkyu long FIFA long em i gat strongpela bilip long kapital siti bilong yumi long go pas long dispela intenesenel resis," Gavana bilong Nesanel Kapital Distrik, Powes Pakop, i tok.

Gavana Pakop i tok moa olsem em i bikpela salens long bungim ol mak bilong FIFA, tasol em i bikpela sans bilong siti, pipel na kantri bilong yumi long kamapim dispela resis long mak bilong em stret.

"Mipela i mekim wok redi long kamapim dispela kain resis i senisim siti bilong yumi i kamap namba wan stret," Parkop i tok.



# Dwellers sempion bilong NSL

Nicky Bernard i raitim

LAE City Dweller i kisim bek taitel bilong ol gen long Nesenel Soka Lig resis bihain long ol daunim Hekari long gren fainal long Pot Mosbi long las wiken.

“Maski mipela lus bikpela long ol(Hekari) long pait long kisim maina primia tasol bikpela tingting bilong mipela long kisim taitel bilong mipela taim mipela winim long las sisen bilong NSL”. Em toktok bilong ol Dwellers.

Dwellers i no givim sans long ol Hekari long stat bilong pilai inap long pilai i pinis. Stat long bek lain bilong ol Dweller ol bin lokim tru ol straiika bilong Hekari we ol bin no gat tru sans long skoa. Tupela tim wantaim i soim wankain pilai long namba wan

hap. Hekari i kisim wanpela gutpela sans taim winga bilong i salim wanpela gutpela bal go long straiika bilong Summy we em klia wantaim gol kipa bilong Dwellers. Kipa bilong Dwellers i save olsem sapos Summy holim bal gut long lek bilong em bai em skoa na kipa bilong Dwellers i ran kam long bungim Sommy we em paul na kikim bal go long sait bilong mak bilong Dweller.

Dispela i opim ai bilong ol bek lain bilong Dwellers na banis makim bilong ol inap long hap taim bilong namba wan hap.

Hekari i traim long mekim pilai bilong ol olsem las gem namel long tupela tim tasol ol Dweller i no givim ol spes long mekim pilai bilong ol long pasim bal go kam.

Kepten, straiika na Hiro bi-

long Dwellers Raymond, i kisim wanpela kona kik na makim stret gol mak bilong Hekari, dispela bal i giamanim olgeta wantaim gol kipa bilong Hekari na ol lukluk tasol na bal i go insait long mak.

Dispela gol i mekim ol sapota bilong Dwellers i pulim bikpela win na singaut na askim ol Dwellers long skoa wan moa.

Hekari i no wari long dispela wanpela gol na ol i wok long pilai hat long taim long bekim dispela gol bilong ol Dwellers.

Banis bilong Dwellers tu i go strong moa yet bihain long dispela wanpela gol, ol namel man bilong Hekari na Dwellers tu i wok hat long painim spes bilong ol straiika bilong ol.



Difenda bilong Hekari i traim long rausim bal tasol pilai meka bilong Dwellers i putim gut tru was long em. Dwellers i win 2-0. Foto: Nicky Bernard

Dwellers i kisim wanpela gutpela bal long namel na hariap tru ol pusim dispela bal go stret long straiika na kepten bilong ol. Raymond i no westim taim, em tanim na giaman beks bilong Hekari na em na gol kipa tasol. Raymond i kikim strong dispela bal na pas long gol kipa na ran isi tasol go pas long net

bilong Hekari.

Dispela gol i mekim ol ol sapota i singaut gen long lokim ol Hekari long kam insait long banis bilong Dwellers na mekim ol Dwellers i lokim inap pilai pinis.

Dwellers nau em sempion bilong NSL namba tu taim, na em karim K50,000 sek mani go long Lae. Hekari i kisim

K40,000 long namba tu ples, ol kisim maina prima wantaim K60,000. Welgris Morobe kam namba tri wantaim 30,000 na Rapaton kam namba foa wantaim K10,000.

Lae City Dwellers na Hekari Yunaited FC bai kisim liklik malolo na bihain ol bai go daun long Nu Silan long stap insait long OFC tonomen.

## TPNG i mekim K172, 000 long Lae

### ...tasol Mosbi i winim Lae

Philemon Tame i raitim

OL komyuniti long Lae i baim 17, 200 Trukai Fan Ran t-siot long las wik Trinde nait taim ol i bin salim long Lae Yacht Klap, na ol i kisim K172, 000. Ol bai givim dispela mani long Tim PNG long mekim wok redi long go long Rio Olimpimpik Gems bai kamap long dispela yia.

Na tu, ol bai givim mani ol i bin mekim long Pot Mosbi long Fonde nait long Tim PNG long wankain wok.

Wankain taim long Lae, ol i bin salim jesi bilong North Queensland Cowboys premiasip na ol i kisim K4, 100 antap long ol mani ol i kisim long Fan Ran t-siot.

Ol top faiv bida long Lae em Papindo, Traisa, Trukai Industries, Eddie Saloon na Ela Motors, na ol bisnis komyuniti i bung gen soim sapot bilong ol long Tim PNG na ol i laik wokabout wantaim long Trukai Fan Ran. Trukai Industries i kisim ples long top faiv long Mosbi tu.

Presiden bilong Papua Niugini Olimpik Komiti (PNGOC), Sir John Dawanincura, i tok tenkyu long komyuniti long Lae i bung long givim sans long ol pipel long eria, taim ol i baim Fan Ran t-siot bilong ol.

Sir John i tromoi wankain tenkyu long ol bisnis haus na ol skul long Pot Mosbi long ol i resis long winim Trukai

Fan Ran t-siot.

Siot ol i baim em ol i redim bilong ol lokal skul long Lae na Pot Mosbi bilong salim gen long ol sumatin na famili long mekim mani bilong skul.

“PNGOC i save kisim sapot long ol spona na Gavman, na nau Trukai Fan Ran i mekim bikpela sapot bilong ol etlit bilong PNG i go resis,” Sir John i tok.

Sef de Misin bilong Tim PNG, Emma Waiwai, i tok, “Tripela etlit bilong PNG i kwalifai pinis long taekwondo na swimming, na sapot bilong kopret ogenaisesen long Lae na ol bisnis haus long Pot Mosbi aninit long Trukai Fan Ran t-siot i soim strong bilong ol etlit bai makim kantri long Olimpik Gems.

Namba tu bung bilong salim Trukai Fan Ran t-siot long Pot Mosbi em i bikpela samting we Maketing Jenerel Menesa bilong Trukai Industries, Andrew Daubney, i lukim kala na stail bilong planti etlit bilong PNG olsem Ryan Pini na Dika Toua long makim kantri na em i tok em i gat bikpela amamas.

“PNG i gat planti namba wan etlit husat i go het long putim PNG long wol mep aninit long planti intenesenel spot resis. Na Trukai Industries bai go het long kamapim dispela bikpela fan reising long helpim ol strong long winim wanem kain dri-

man ol i gat long spot.

“Mi tok tenkyu long ol bisnis haus, institusen na ol patna husat i stap pas wantaim Trukai inap 17 yia. Sapos yupela i no stap, dispela Fan Ran resis bai no inap long karim kaikai. Sapos yupela i no sapot, ol etlit bilong PNG bai no inap winim driman bilong ol long winim gol medal bilong PNG,” Daubney i tok.

Ol Trukai Fan Ran t-siot ol i bin salim long Pot Mosbi i winim Lae bikos 100 skul i resis na ol mekim mani mak long K200, 000.

Long wankain taim, tupela Kassman husait i kwalifai long taekwondo i bin stap long Trukai Fan Ran t-siot resis i bin kamap.

Tupela i soim sampela liklik eksen long tupela bai go resis na tupela i tok, “Mitupela i amamas long ol i makim mitupela na nau mitupela i lukluk long go resis.”

Pilaia bilong PNG SP Hunters, Enoch Maki, i stap tu long Trukai Fan Ran resis na em i tok, “Hunters i pilai gut inap long sisen bilong dispela yia i stat na mi amamas bikos mipela i makim kantri. Wankain tasol, ol etlit bilong Tim PNG bai makim kantri long dispela bikpela intenesenel Olimpik resis na mi tok tenkyu long ol kopret kampani na bisnis haus long bikpela sapot bilong ol.”



Piksa i soim tupela Kassman, husat i kwalifai long taekwondo na i redi long go resis long Rio Olimpik Gems.




Maketing Jenerel Menesa bilong Trukai Industries, Andrew Daubney, i sanap long han kais, i kisim wanpela Air Niugini tiket bikos Trukai Industries i winim ples long top faiv resis. Ol Piksa: Nicky Bernard





**MI HIRO YA:** Straika na kepten bilong Lae City Dwellers i traim long abrusim beks bilong Hekari long gren fainal bilong NSL soka long Mosbi las wiken. Kepten bilong Lae em trupela hiro long skoa tupela gol long win bilong ol.



*Oi poto: Nicky Bernard*

**RAN LONG SPES:** Pilaia bilong Dekenai i lukluk long salim bal go long wan pilaia bilong em long praivet netbal kompetisen long Mosbi.




**MIPELA KISIM TAITEL BEK:** Lae City Dwellers i raun long tok tenkyu long ol sapota bilong ol long Sir John Guise Stadium.



**PAITIM DISPELA BAL:** Pitsa bilong PNG Pawa i redi long tromoi bal long sofbal pilai long Mosbi. Dispela wiken bai lukim Nesenel Sempionsip bai kamap long Mosbi.



**EM ORAIT:** Ol sapota bilong Hekari wantaim bena bilong ol.



**KAM KISIM:** Stargroth Amean i pasim bal go long kepten bilong em Noel Zeming long pilai bilong ol taim Hunters i bungim Tweed Heads Seagulls long nupela Nesenel Futbol Stadium long Mosbi long Sarere. Hunters i win 20 - 18.



**GO LONG WE:** Rana bilong Brown Eagles i traim long kisim namba tu bes taim pilaia bilong Brothers i lukluk long kisim bal. Brown Eagles i aut long resis bilong dispela yia.





## DIANA

Tuna

Niupela Swit Teist  
Nau Igat Moa Oil!



### PNG's ORIGINAL TUNA

Manufactured by:  
RD TUNA CANNERS LTD.

# Hunters skwat i redi long raun namba 4

...kik bilong  
Zeming i gat  
moa pawa

**TRAI TAIM:** Risev hap bek bilong SP PNG Hunters Atte Bina i flai antap long trai lain long putim wining trai bilong ol taim ol i pilai wantaim Tweed Head Eagles long Mosbi. Hunters i win 20-18. *Poto: Nicky Bernard*

**Philemon Tame i raitim**

PAPUA Niugini SP Hunters skwat husat bai pilai long raun namb 4 bilong Intras Supa Kap resis i redi pinis. Resis bai kamap long Sunshine Coast Falcons long Kawana Spot Kompleks long dispela wik Sande, we ol bai stat long 2.05 pm.

|                            |                     |               |                 |                     |                     |  |                     |
|----------------------------|---------------------|---------------|-----------------|---------------------|---------------------|--|---------------------|
| Ol skwat bilong Hunters em | 6                   | 6. BINA, Atte | 11              | 11. BORANA, Nickson | 17                  | 17. GOMA, Edward na                    |                     |
| 1                          | 1. WERA, Adex       | 7             | 7. BOAS, Watson | 12                  | 12. GLARE, Warren   | 18                                     | 18. SAILAS, Gahuna, |
| 2                          | 2. ABAVU, Bland     | 8             | 8. WAN, Henry   | 13                  | 13. BRANDY, Peter   | tasol ol bai rausim wanpela bilong ol. |                     |
| 3                          | 3. ZEMING, Noel (C) | 9             | 9. PUARA, Jnr   | 14                  | 14. AMEAN Stargroth |  |                     |
| 4                          | 4. TETEH, Thompson  |               | Wartovo         | 15                  | 15. LEPAN, Tuvi     |  |                     |
| 5                          | 5. OLAM, Justin     | 10            | 10. SIUNE, Esau | 16                  | 16. MAKI, Enock     | ...ridim moa long pes 25               |                     |

## Mitsubishi FUSO Rosa Bus



Apgrred ensin  
130Hp  
4 silinda disel



Hariap nau na go long  
Boroko Motors dila bilong yu



Port Moresby ph: 325 5255 | Lae ph: 472 1144 | Mt Hagen ph: 542 1933 | Tabubil PH: 649 9048  
Kimbe PH: 983 5035 | Madang PH: 422 2659 | Kokopo PH: 982 8193 | Goroka PH: 532 3552

Email: info@borokomotors.com.pg  
Website: www.borokomotors.com.pg

